

瓊山縣志卷之十八

金石

重修武廟記

禮樂之興教化所由立也方今邛隆之世禮先崇報樂和神人三重五倫之道格於上下有功德於民者悉列秩祀而禮之隆殺有等差焉武廟於我朝爲大祀崇以帝號祠以太牢復倣闕里之儀追封三代蔭乃後裔歲凡三祀蓋關帝之威靈顯應功在社稷如日星河嶽之昭垂雖鄉曲童子皆能言之僻壤窮荒莫不比戶虔奉二千年來廟食之隆罕有比倫州郡長吏將天子之命以時修其祀事則必有一定之所以隆典禮而表敬恭

瓊山縣志

卷十八

金石

一

非同於閭閻之祝也瓊州武廟在郡城內者有東西各一考之志乘舊廟海南衛右明宏治初建於城西抱珥山上卽分巡使者廨右古所稱瓊臺福地也自後歷四百餘年至國朝康熙年間屢圯屢修迨乾隆六年遭颶風傾圮知縣江日暄修之九年巡道謝樾以廟地偪仄未合程式乃移遷於城東隅舊府學旁卽今雁峰書院之左側而抱珥山廟遂廢未幾土人僉稱廢之不利二十二年巡道張君介祺修復之於是東西二廟並列蓋西卽抱珥山廟而東卽此移建之廟也道光甲午余權署雷瓊兵備下車往謁覩西廟規模雖狹殿宇猶完東廟則桀桷傾欹大半頽壞幾不能蔽風雨溯自乾隆始

建迫今垂百年中間嘉慶丁卯主持道士趙元真嘗募金修葺末幾廿載又爲颶風所損乘時修復非守土之青而誰責歟是年十月鎮帥謝公署瓊州府諸公先後履任謝公倡議捐俸修建請諸將吏衆議僉同共捐金得若干數以右營守備黎君必榮能事事委令董率鳩工庀材擇吉於丁未夏月載興版築凡閱五月而落成基址仍舊而巍峩壯麗丹牖一新洵足壯觀瞻而符禮制廟之廡下多列室遇考試十三屬武童僦居有租積存以爲小修之費官爲經理以行之久遠夫廟貌之設以妥神靈也建置之興廢於以觀禮樂治化之本而顧可置爲緩圖乎且圖經久之計自後春秋致享朔望展

謁胥於是乎在余得率郡之僚吏駿奔走執豆籩肅將其誠敬而與民共奉之庶幾乎禮明樂備民和而神降之福繼自今益恪恭敬謹追思謝公之創建斯廟與今鎮帥將吏等繼事之勞而且費也相與維持保護時加修葺以期完全巋然永峙爲此邦億萬年無疆之休而凡郡之率作興事有裨於國計民生爲地方永遠之利者胥視諸此余於後之官斯土者有厚望焉是爲記

瓊州總鎮謝得彰 雷瓊兵備道張培春 瓊州府知府諸鎮 瓊州海防同知斐驤 崖州協副將劉德尊 都司伍志雄 守備黃任揚 鎮標左營游擊何朝亮 左營守備黃紳 鎮標右營都司朱喜貴 右營守備

黎必榮 海口營參將林開疆 海口營守備王鵬年  
署海口營參將余得彪 鎮標左營守備葉華魁 儋  
州營游擊塔魯 儋州營守備王應陞 萬州營游擊  
連芳 萬州營守備張鱗 海安營游擊徐成章 海  
安營守備陳輝龍 瓊山縣知縣張德尊 文昌縣知  
縣劉祖望 澄邁縣知縣高凌漢 定安縣知縣侯昕  
儋州知州松壽 崖州知州譚光第 臨高縣知縣崔  
學海 樂會縣知縣呂華賓 陵水縣知縣張毓政  
感恩縣知縣黃鈴 候補知縣羅嘉會 庫大使高廷  
貴 府經歷尹光文 山陰葛兆豐 紹興陳俯菴  
蘇州王信夫 山陰施涵川 山陰張德威 山陰王

午莊 長白瑞輯五 黔陽郭警齋 粵東鄒丙堂  
韓江林福記 瓊州總口王焯 瓊州總口胡鈞  
道光十五年歲次乙未桂月中浣雷瓊觀察使者豫章  
張埴春敬撰並書

案碑中郡守諸鎮府縣志不載考鎮十二年任崖州知  
州十四年調署郡守十五年府試十三屬士子有試院  
倡和詩瓊州紳士多和之刊成一冊傳誦當時而志乘  
不載其名豈以署缺而不書歟儋州知州松壽文昌縣  
劉祖望府志職官十六年任碑勒十五年八月已有其  
名是十五年任志誤而崖州知州譚光第定安知縣侯  
昕臨高知縣崔學海陵水知縣張毓政感恩知縣黃鈴

武職劉德尊伍志雄黃任揚黃紳林開疆王鵬年余得  
彪連芳王應陞張鋒府志俱不載是其遺漏無疑葉華  
魁十五年任碑刻有據志作十七年任亦誤至山陰葛  
兆豐等十人爲道府署幕友重修觀稼亭記已詳言之  
皇清敕授儒林郎孝廉方正辛酉舉人揚齋王公墓誌銘  
南海衣冠之氣鍾毓偉人朱崖禮教之邦誕生名士大  
丈夫身處其地上不能股肱王室建豎勛庸下亦可羽  
翼人文覃敷教澤所謂積善之聲傳於里鄙詒謀之裕  
穀其子孫未有若吾邑揚齋王先生者矣先生諱承烈  
字昭甫號揚齋郡城人先居於鄉之青草也曾祖維乾  
祖邦篋父家錫國學生貤封修職郎並以謹厚承家惇

端垂訓先生稟特達之英姿負端凝之雅度幼蓄奇慧  
長爲文雄事親得其歡心同氣深其友愛受業於卓齋  
先達賞其資質不凡見知於學使平公詫其文詞博雅  
未弱冠補弟子員旋食廩餼續之冠豫章郡學聲雋一  
鬢叔開舉洛中秀才羣推三絕下帷汲古目不窺園循  
陔養親情殷負米歲屈辛酉始登賢書鹿鳴賦三蟾宮  
攀一南宮就試尾不燒於龍門東銓不挑心遂絕於鳧  
舄乃設季長之絳帳耕杜氏之寶田從游徧十縣三州  
多是成名之士位置高九能十選無非課實之人此固  
十餘年化雨雨之春風風之所默酬於素願者也道光  
紀元恭遇皇上登極覃恩中外詔舉孝廉方正有司以

先生應選咨部授職恩榮荷三徵之貴金闕詔頒冠帶增六品之光瓊臺望重孝廉多士式方正大雅矜人皆羨先生之功名遇亦奇矣我獨高先生之品行孰能及之歲丙戌周觀察敦請主瓊臺講席以生平之模範爲後學之津梁經義質疑齋規峻肅翕符人望奚愧經師拔萃者貢成均登賢者叨館選濟濟多士祁祁生徒有胡翼之楊中立之高風焉丁亥秋喻觀察復延掌教主賓誼治贄以文者不干以私師弟情親語以主者不遺以下故遊先生之宇皆願祝其遐齡出先生之門長欲沾其教化天何不弔憇遺一老遂辭人世而以壽終也先生以乾隆甲申年十一月初一日巳時生以道光丁

亥年十二月初七日子時卒春秋六十有四德配黃安人無出續周安人男四長廷傅邑廩生次廷俸邑庠生三廷佶四廷倌俱幼學女五長適大英村歲貢毛日晟長子次適西昌夏水村例貢生陳貴琅三適北港候補訓導饒定九子四適大井巷監生楊文紀五適白沙村庠生崔凌雲先生兄弟五人長承謨國學生次卽先生三承勲國學生四位清增廣生五天祐辛酉科拔貢長孫沂暄尚稚庭階之秀是曰芝蘭棣萼之材皆成杞梓廷傅等次年三月開奠闔郡皆至同鄉共口束以生芻敢當其人如玉輓之佳句眞令死者如生若先生者可謂榮矣以己丑秋月塋於城西坡博之原日月易邁墓

草將宿懼湮遺美謀樹貞珉先生男與余有世交誼請  
敘顛末以銘幽謹拜手而銘曰城南仁里鍾此耆英髫  
齡穎異長而聰明通今博古矩步規行白華潔養庭茂  
紫荊魯芹擷秀秋賦鹿鳴廣敷教澤六一先生春風化  
雨槐市陰橫恭膺寵遇廉正持平臬比講易教育環瓊  
濟濟多士翹秀匠成謝階寶樹蔚起書城矍鑠是翁山  
斗垂名其死不朽其生也榮鑄之樂石永誌幽塋  
敕授修職郎敘選儒學訓導丁卯科優貢世教弟曾日  
躋拜撰  
敕授文林郎癸酉科拔貢辛巳恩科舉人門生鄭文彩  
拜書並篆額

道光十年歲次庚寅秋月立

明邱文莊公遺像

奇甸鍾靈篤生傑英文莊特起望重有明義補西山學  
富南溟厲品鏗鏘說經經性剛俗忤才高世驚近冠  
五嶺遠頡兩京千春論定偉哉日星清芬仍在遺像崢  
嶸

大清道光十七年歲次丁酉七月既望吳縣後學董國  
華拜撰

明海忠介公遺像

海公嶽嶽神羊一角鐵石心腸邪佞側目萬言天驚片  
紙霜肅峩峩南臺鬱鬱東閣生榮歿哀人範臣鵠華表

靈歸虞淵日落淚血淋漓忠魂夜哭瞻拜景堂英風若  
昨

大清道光十七年歲次丁酉七月既望吳縣後學董國  
華拜撰

案邱海二公石像爲董觀察摹勒並刻贊於石端忠介  
公贊用景堂二字景爲影之正字周禮尚書作景不作  
影考漢校官碑聆聲景附皆作景蓋景爲正字影爲後  
出之字徐鉉說文新修字義云影者光影之類合用景  
非毛髮藻飭之事不當從彡老子銘含景匿形唐公房  
碑轉景卽至侯成碑惟想形景影皆作景觀察精於漢  
隸寫景字亦存古法景堂卽影堂宋人稱祠堂爲影堂

見於涑水紀聞朱子全集等書

清貞節洪母馮孺人墓表

貞節馮氏博茂沙上村人少許字於涇洲新埠村洪家  
夫諱見邦行聘之日遽病亡氏年十六毅然有登門守  
節之志父母憐其年少勸之改嫁親鄰亦來勸之舅姑  
聞之以爲家無寸產難以度口再三推辭俱不九從及  
葬日呼媒氏同往撫棺大哭觀者莫不感泣後歸洪家  
終喪三年不復歸寧氏織麻爲網以度日奉侍舅姑忍  
荼集蓼十餘年不敢告勞親終克當大事殯葬如禮遇  
荒歉時日用不給鄰里聞之與之粟亦不受惟自食其  
力閉門困守而已族叔見其苦節可嘉撥己田三坵與

氏養生葬死之資氏終於道光己亥年冬十月圖中紳耆同來會葬聯名請旌於朝建坊墓前以勵風俗屬予爲文以表之夫氏之貞節矢守困苦養親葬終舉人生不堪之境以一身兼之求諸詩禮之家尚不易覲況出於貧窮者乎此其苦節貞志人所難能無待表揚而已著後之過墓門者咸太息而生感也夫

歲貢生同邑洗鳳翔撰

節孝鄭太孺人墓誌銘

道光二十年六月十旬余太孺人卒越二年壬寅夏月卜葬於邕陽之原其子文甫茂才余姻親也

以狀屬銘幽予與太孺人聯姻居同里閨見其節行淑德素所欽企者敢以不文辭按狀太孺人氏沈東岸乃聰公之女庠士楚山公之媳庠士清齋公之妻生有令德少遵姆訓工鍼黹勤紡織夜無冬夏憊聲軋軋每坐漏永年族鄙聞其賢名及于歸我太孺翁時太老姻母在堂太孺人克盡婦道奉侍左右惟謹久而弗怠其相我太孺翁也鷄鳴戒旦勤儉持家太孺翁與其兄實齋伯仲二人同胞同學同發奮於功名家本寒素太孺人維持內外不以有無紛其心故兄弟均得勵志潛修蜚聲類水者皆太孺人之力居多也未幾太孺翁棄世其兄實齋亦相繼云亡其時我文甫姻翁方二歲太孺八

拊膺痛哭欲以身殉而未即從於地下者上有自髮之  
耄姑下有黃口之孤兒在也是以撫育其孤與其姑相  
依爲命集蓼茹蘖備嘗艱苦迨姑終養喪祭盡禮無悔  
於心其勤儉持家親操井臼積銖累寸以完子婚教之  
以義方勉之以勤學勗之以勵名節期之以懋功修故  
文甫姻翁得以一意讀書文名日噪遂補郡學弟子員  
人謂太孺人之心稍慰矣然猶未也及舉一孫男太孺  
人顧而喜曰人言有孫方是兒今旣得孫吾有兒矣其  
富貴功名儻來物耳何足道哉其見識之卓類如此雖  
然節婦之子多象賢天之所報苦貞也其後有達有不  
達則人之所自爲也今令孫毅臣以少年英雋一試進

庠與文甫姻翁橋梓濟美皆食太孺人之德正天之所  
報其艱而彰其節義也將來掇科名登仕路紹其先代  
鄉賢名宦之祖烈正未可量豈僅融洩一堂樂蔗境之  
彌甘期榆年之長駐篤祐於當躬云爾哉胡爲偶感一  
病醫療罔愈竟至不起哀哉太孺人性情嚴肅詞氣不  
少假屈然處妯娌間柔聲和色故人多悅從居身節樸  
釵荆裙布不蓄婢僕勞心勞力悉以一身兼之四十餘  
年如一日卒獲請旌如例距生於乾隆丁亥年春秋七  
十有四子文甫郡庠生女一適北門街馮家先逝孫一  
毅臣邑庠生子之婿也銘曰懿彼壺範惟德與歸來嬪  
榮陽敬戒無違孝以事姑甘旨奉給相夫教子行成名

立鸞鏡分飛矢志栢舟冰霜表潔鍾郝名流男布女錢  
摒擋一切健乃持門丈夫之列籌車紡夜瓶鉢汲晨恩  
深教養劬躬勞神徽留彤管阡表瀧岡銘此幽竈千載  
垂芳  
敕授徵仕郎銓選直隸州州判丁酉科拔貢姻世姪王  
廷傅拜撰并書  
道光二十二年歲次壬寅仲夏之月立

文昌閣碑記

瓊城小西門內有文昌閣焉與邱海二公故里接壤原  
係黎婺廟基嘉靖年間舉人廖士衡等改建範賢義學  
萬曆年間地震廟壞鄉人盛尚志王一德等改建文昌

閣其正殿連大門三座南向迨乾隆四十年正殿二進  
傾圮僅存魁星神像至嘉慶二十一年紳士伍鳳翔同  
首事張秉和邀眾等力捐得白金四百餘元於是鳩工  
庀材重建改向北一座三間前豎排樓並修後香燈舖  
三間議交秉公掌理按年收租供香燈祭祀外所有餘  
存以備修葺之需道光八年紳士呈請各憲仍復義學  
在案俾奕世以爲學校教育人才之地可謂法良而意  
美矣經始於二十一年越一年而落成向之鞠爲茂草  
者今則規模整然矣向之積爲瓦礫者今則廟宇巍然  
矣夫自明及清屢與屢廢而終不至荒棄者豈徒崇廟  
貌薦豆籩循拜跪之虛文飾衣冠之儀節云爾哉必將

教學明倫共敦孝弟尊師重道藉廣化育父詔其子兄勉其弟循循然服習於禮教之中安見文莊之經濟忠介之氣節不可復見於今日也哉爰擴其巔未勒諸貞珉以爲後人勸

道光二十三年歲次癸卯重陽月吉日

文會試賔興碑正字碑額

欽命分巡雷瓊兵備道前署按察使黃宗漢今本道將捐廉並商同守令籌款爲賔興公項傳集紳士酌議規條勒石示諭永遠遵行

一瓊郡賔興之舉專爲文舉人及拔優貢公車而設別項不得動支

瓊山縣志

卷十八

金石

十一

一道光二十八年十月初七日將三千千錢交近郡城當商收領每年一分利生息算至道光三十年會試以後十月初七日支息一次以後則三年一支其利上之利概不取離城遠之當商及本錢少者免領

一此項每年所得息將八成與文會試二成與拔貢各按每科人數多少均分

一北闈中試及留京者雖未在本籍起文但經入會場一體給領

一計文會試三年一支外所有二成與拔貢共存錢一百八十千由該監院務送瓊山縣仍發原商領回生息共息錢每三年一算仍歸併十二年拔貢生均分

一何科有優貢廷試則觀會試人數多少如此科每名會試領錢若干優貢減半

一凡拔優貢只頭一次准領

一此項催收發給歸瓊臺監院管理每會試後由本道札飭該監院於八月間諭知領錢之當舖預備現錢盡十月初七日解交瓊山縣由縣查收一面稟知本道一面移送書院候各會試到院具領每錢一千准抽六文與監院以爲紙張之用俟領完後將何名下何月日具領分別造冊稟報本道查覈

一逢恩科會試則統計三年之息以年半歸恩科年半歸正科

一凡會試及拔貢俱以進場爲斷故須俟試後查明實係入場者方准給領其有業已領文到京而臨時或遇丁憂或迴避親族實因患病不能進場者亦准給領外其餘概不得藉故請領

咸豐四年歲次甲寅十月吉日黃道憲重刊

一凡拔貢有事故未應廷試將其名下錢額仍存當商俟補試後給領

一凡優貢有本年不入京後補廷試者當與下屆會試之人統算補試者例得其半

一試後有留京但確係入場准其父兄子弟來領仍取同會試之人具給以防冒混

一優貢已屆六年不補試將所存之項添給與本年會試者均分其遲至六年後即補試亦不准支

一寄籍瓊屬之舉人拔優貢如查明實有田廬墳墓距今在三十年以上者亦一體給領

道光二十八年十月郡守林鴻年瓊山令劉斯增署樂會縣劉典臣署瓊州府學教授莫瓊林董事紳士瓊臺山長雲茂琦楊文熙雁峯山長蔡藩邱對勤瓊臺監院韓煥彝王廷傅雁峯監院吳儁暨舉貢生監等仝敬立添設瓊臺書院外課膏火碑

陞授山東按察使司雷瓊兵備道黃 示爲曉諭事照得本陞道蒞任以來雖日以振興文教培養人才爲汲

汲而才學未裕教術多疏兩載於茲寸衷滋愧今復蒙恩命陳臬山東行將告別其惓惓於諸生者正無已也所有前年本道捐廉三百千生員張朝敬捐錢四百二十千選拔生陳干釐兄弟捐錢一百千共八百二十千業交瓊山縣發商生息爲瓊臺書院膏火在案茲復有歷年曠課扣存項下除提賞生童外尚餘八十九千五百文本陞道再捐廉九十千五百文仍由該監院交瓊山縣照前發商生息合計前後所捐共制錢一千二百串按月一分行息每年將息錢一百二十千現與瓊臺山長雲及該監院韓公同酌議定章程生員加外課十名每名八百文童生加外課十名每名四百文共計膏

火錢九十六千文尚餘錢二十四千文作爲師課獎賞  
每月三千每課一千五百文以八百賞生員前六名第  
一名二百文第二第三名各一百五十文第四名第五  
名第六名各一百文以七百賞童生前六名第一名一  
百六十文第二名第三名各一百二十文第四名第五  
名第六名各一百文爲此曉諭永遠遵行毋違此示  
道光二十九年二月初二日示

瓊州鎮鮑公去思碑

在昔欒公立社石相爲祠冒禁鑄太宰之碑及身建長  
孫之廟靡不編諸史冊炳若丹青良以功高則遺愛自  
深德盛則去思彌切天良未泯公論猶存固非私恩小

瓊山縣志

卷十八

金石

十四

惠者所可牢籠亦非弔譽沽名者所能強脅也然則瓊  
州鎮鮑公之有功德於茲土也又烏可以已哉公名起  
豹字文蔚一字愛山六安州籍寇氏世封侯爵耿家代  
以將傳其先贈公諱友信者以進士授雲南昭通鎮守  
備因勦匪于獨坪鄉血戰捐軀歸先軫之元魂猶敵愾  
露姜維之膽志欲吞仇事後奏聞准入昭忠祠給雲騎  
尉世襲是時公方八歲朱太夫人城傾一慟地闕重填  
爲夫教子而子已成使死復生而生不愧迨嘉慶十七  
年公始襲職迄道光十六年洊升至瓊州鎮而太夫人  
亦迎養來署公形狀奇偉局量寬宏大度清操老成鍊  
達有磊落光明之概兼精明強濟之才瓊州處海中權

通洋萬里民黎蟻雜商賈蜂屯往往大鸞鷗張據山村  
而扇毒巨臙黿駕馮港汊以逞妖公則鶴俸頻捐鴉軍  
密布效舌庸而審勢運心法以出奇白羽親揮勁旅煥  
旌旗之色滄波手挽水仙懾金鼓之聲以檀道濟爲司  
空而長城無虞自壞有石敬瑭爲重鎮而浮圖始合其  
尖迄今鮫室常恬鯨波莫吼萬家春盎掃盡游氛羣島  
波澄朗於皎月者非公之力不及此且夫可久者方能  
可大善始者尤貴善終假令京兆留張無過五日河東  
借寇惟許一年則土薄而草木難生水淺而魚蝦罔有  
公在任十三載童頭易白人眼常青劍客奇材半是戟  
門箕帚花苗蛋戶無非竹馬兒童加以素性仁慈豪懷

慷慨晏平仲脫驂贖友鄭當時置驛通賔遇有未弁窮  
兵孤兒孀婦罔不曲爲周給備極拊循以故臂使綦靈  
膚功迭奏毋須雷厲自爾風行而事太夫人尤孝板輿  
常侍茅饌常精人共比於王公母亦稱爲曾子時因太  
夫人年高多病累次乞求終養適當卸篆艱信遙傳草  
草登程匆匆判袂所謂求忠臣於孝子之門者信非虛  
語也芳等久隨鞭鐙深沐甄陶每對甘棠難忘召伯偶  
憑大樹便憶將軍爰紀五事於郭沖特請數行於孫綽  
從此心香永奉緬光風霽月以馳思頂祝彌虔向福海  
壽山而獻頌頌曰 桓桓鮑鎮矯矯虎臣手爲霹靂身  
是洪鈞光臨茲土挾纊飲醇有疾病則呼父母凡有血

氣莫不尊親公歸不復誰撫吾軍天風海水瘴霧蠻雲  
噫噓唏羣黎百姓何可一日無此君

道光二十九年歲次己酉孟春月下浣之吉瓊州八營  
官兵同入石

署理瓊州鎮何芳率同標下副將吳襄 參將陳魁倫

游擊陳啟祥 游連芳 杜集祥 曾高 都司田英

栗襄 徐成章 謝虜燕 唐太陞 守備楊茂雄

蔡成榮 張得勝 洪其法 戴文忠 梁定貴

黃開廣 沙鎮邦 鄺勉暨八營千把外額世職武舉

書識 隊目並兵丁仝建

特賜五品職銜高要縣學優生唐千鷺頓首拜撰

敕授徵仕郎候選州判丁酉科拔貢王廷傳篆額並書  
案鮑起豹安徽六安縣人道光十六年任整飭武備親  
歷巡洋遇有海盜奮勇力戰盡殲靡遺瓊無海患者十  
年居恒愛恤士卒激勵其忠義之氣禮賢下士詩酒交  
驩與邱孝廉對勤友誼最篤鎮瓊十年內外安輯故標  
下建專祠以報恩後官湖北提督遇髮匪攻陷武昌革  
職歸里宦橐蕭然老益窮餓無以自存後對勤赴春官  
過六安訪之深爲歎惜常時與知交述之

武帝廟碑記

原任湖北承宣布政使前史官張岳崧拜撰并書

帝以忠義廟祀萬世尚矣瓊山甲子市舊有廟雍正六

年建以奉帝經始於市主周贄本而市人吳瓊富富子文俊先後釀衆金修廣之廟以不廢且夫帝以忠義廟祀萬世是帝以忠義垂教萬世也日中之地闐闐屠酤之所鼓而游冶惡少狡僧之所居是奚識所謂忠若義者哉然而過廟必肅見帝像必拜何哉誠忠義筦乎人心不可泯也夫人知忠義故知尊帝知尊帝則必知尊其教知尊其教則必毋虞毋詐毋狠鬪若訟毋習惡俗毋藐法恣肆毋非分以逞氣毋苛斂商賈毋擾貿易毋擅動祀產有一於此是曰不忠是曰不義帝其殛之不可以宥尚其戒哉衆請記廟故述緣起且推帝之教萬世者以諭市人

道光一十九年歲次己亥冬十一月穀旦

重建雁峯書院碑

雁峯書院乃瓊山生童肄業地也地本瓊庠故址明先賢邱文莊公讀書其中境內無雁至是始來集故先生有雁集瓊庠記南對三元峯故先生有雁塔薰風詩實爲瓊州八景之一其後瓊庠移於府治東偏地遂扁乾隆己丑邑紳吳杜溫馮何毛八家建社學於此道光辛巳瓊山令于學質議請改爲書院名之曰雁峯仍古蹟也海上固多颶風且久未修葺椽瓦多失墜不足以新耳目前觀察黃公宗漢倡捐俸五百緡踵而捐貲者數又將十之鳩工庀材規模頓改從此風雨除烏鼠去諸

生朝夕於斯請益觀摩蒸蒸日上鄉先生之樂亦守土者之幸也今當落成少長咸集掌教者爲道光戊子孝廉蔡藩以同人之請來屬爲文將謀鐫石示後余素喜蔡同年之修身立教且望此邦士習文風之日新又新也爲摘其畧而敘之時與共事者爲邑舉人陳毓姜拔貢生吳儻廩生林鳳翥黃建策增生王崢山王子俊太學生麥成潞廩生麥穗岐候補訓導張伯琦若而人皆可嘉也

咸豐二年歲在壬子暮春月 知瓊州府事翰林院修撰侯官林鴻年撰

瓊江書院碑

瓊山縣志

卷十八

金石

十七

瓊州處大瀛南造物鍾靈粵衍磅礴蔚然海外雄封又值聖天子嚮明繼照聲教暨訖海滋山陬文明丕振故皆家有塾黨有庠文人士氣蒸蒸日上千村百崗雅歌相聞焉癸丑冬余自肇羅移巡雷瓊暇輒課士瓊臺雁峯兩書院見夫室宇修整諸生以時肄業其間深喜其彬彬然有儒雅風越乙卯冬鄉塾環江書院適告成內祀文昌帝君外爲講堂翼以兩廊繚以周垣講誦庖湑之所罔不畢具邑學博張伯琦與多士等期善作者之必善成善始者之必善終丐余一言記其事以昭示後人余以獎善勵俗使者之責也因樂據其事而書之其地在瓊山調塘二都距郡七十里平疇突起一墩廣約

里許東爲張家園書院適踞其巔之西居高居陽兼擅一方之勝面三江而背七星左尼山而右石灘近則帆影參差波光上下水石咽激聲戛洪鐘遠則諸峯羅列勢若星拱蒼翠詭伏綺綰繡錯歌咏之餘仰觀俯聽足以怡情適性陶寫天真誠讀書奧區也抑余尤有說焉夫所謂讀書者豈僅工帖括博科名之謂蓋將嚅嚅道眞涵泳聖涯養根竅實體充用腓學問經濟期大有裨於當世如邱文莊海忠介以儒生崛起海外厥後正色立朝或訏謨讜論經術湛深或剔蠹鋤奸忠貞鐵石本氣質爲文章均卓然爲一代名臣學者幸生其鄉當企其爲人孔子曰見賢思齊焉詩曰高山仰止景行行止

苟是則是倣亦步亦趨他日斧藻皇猷峻嶒氣骨與文莊忠介先後輝映不徒爲章句之儒是則余所厚望也是舉也肇其迹者吳張陸王鄧宋六姓分爲十家釀金積資以裕賔興膏火至鳩工庀材構造室宇則創之者貢生張伯琦贊之者增生張其泰附生吳漢章躬勞厥事者則附生陸海王天樞王懷秀張罔書余嘉是舉之有造於鄉與諸生之黽勉趨事襄成美舉且欲使鄉之士知學當實有所表見於世並望兩郡各鄉聞是風而興起焉庶皆廣廈大庇居肆成事處則純儒出則純吏不必區區功名事業卽所謂功名事業者亦超出尋常萬萬矣爰書數言以告有志之士

賜進士出身分巡雷瓊兵備道兼管水驛事務西蜀黃  
鍾音撰 候補訓導張伯琦書

咸豐五年歲在乙卯冬月立

### 報恩祠碑記

報恩祠之建瓊之民所以奉先大夫也先大夫由嘉慶  
己巳科進士授職部曹洊升諫垣道光辛巳歲簡放雷  
瓊兵備道時毓桂與曉厓胞叔叨與鄉薦奉嚴命與家  
兄毓口家居侍先大父母以故先大夫觀察海邦政績  
事功未盡悉其詳焉丙申桂忝登進士兵部供職丁巳  
以知府揀發廣東承乏雷郡瓊民特以祠之碑記爲請  
夫衣德紹聞人子之繼志也建祠享祀部民之知恩也

### 瓊山縣志

#### 卷十八

金石

十九

桂深銜結之而要不致以私情感瓊之民也瓊俗質直好  
義愛上急公瓊山剛峯兩先生之遺風猶有存者茲祠  
之建僉以爲報恩如禮所謂有功德於民者則祀之義  
也公也非私也而先大夫之政績事功桂無庸贅一詞  
矣顧桂守雷陽與瓊密邇感瓊民之不忘舊德當如何  
凜承先訓用紹前徽惟有正己率屬敬事愛民以上繼  
先志下慰輿情此則桂之志也夫亦瓊之士民所期於  
桂之志也夫

咸豐七年丁巳仲冬穀旦

賜進士出身雷州府知府次男毓桂謹記並書

重修海口天后廟記

環瓊皆海也當南北之衝一大都會爲往來舟楫所必經者則莫如海口萃人物之繁華攬輿圖之勝概枕山帶海虎踞龍蟠形家謂海口之得地者則莫如大廟廟祀天妃靈爽迭著舟行者必請命於神許而後濟事亦如之錫茲祉福惠我無疆有自來矣廟創始於元沿襲於明而香火極盛於清元無考已明洪武間商人譚海清等捐建後寢三間築觀音山及塑諸神佛像相傳爲蘇福廣潮瓊五府同建雍正七年監生陳國安生員楊鳳翔等募建大門三間乾隆十一年復募建廟前舖十間歲收租銀以供香火而海口關稅內每年支擔規銀四兩四錢辦春秋二祭則雍正十二年知縣鮑啟泌所

請准奉行者也今百有餘年於茲矣風雨侵蝕榱崩桷折非以妥神靈壯鉅觀也道光二十九年海寇張十五猖獗攏舟海口幾被蹂躪炮火轟擊彈子如雨居民無一傷者人以是益念神之功回憶歷朝鼎革以來屢被兵燹而廟巍然尚存其神通廣大又何如也歲辛酉建廣潮高瓊五行商民相與捐建因其垣墉而改造之鳩工庀材輪奐一新內外堂寢亭臺門廡俱備存其舊也和衷共濟邀福神靈波平浪靜時和氣清喜風月之明媚樂宇宙之昇平又何惜韓陵片石而共垂令名是役也費白銀八千有奇襄其事者五行紳商也例得附書瓊邑舉人李向桐撰 瓊邑貢生黃琮潤敬書

咸豐十一年歲次辛酉冬月吉日

劉公隄三字大碑

公篆長紱號佩泉湖南長沙府湘潭縣人於咸豐九年仲冬任瓊州府事

同治元年仲春月督理紳商王道文等立

重修瀛海書院記

瀛海書院者何因海門社學而更名之也曷名乎瀛海九洲之域小瀛海處其內大瀛海環其中又渤海之東有瀛海其山爲瀛洲所謂蓬萊方丈瀛洲也海口瀕於海廟位於東故名之以瀛海曷始乎爾道光二十三年麥成澤文其煥等以後殿傾頽已久未有以處生徒也

創議捐建移祭文昌於其中而以前殿爲講堂添設大門樓移祭魁星與文昌對照冀文運之復興也門外有池池有蔚文樓震於雷形家以爲不利胥塌平之而以橋石砌門外闌于規模宏敞煌煌乎稱巨觀焉久而文風不振決科不售思稍易之未果也癸亥中秋颶風暴作海水冲溢崩塌民房官廨無數大門卒倒池水驟長數尺浸海階砌波濤翻湧人皆股栗趨後殿避之門外學海文瀾石坊碎爲十餘段涿鹿之師沙霧迷塞昆陽之戰瓦屋皆飛無踰於此未幾海水陡落天復晴霽其夜月色如晝沙明水靜天道之變遷靡常人事之喜懼不一秋士悲秋感慨繫之矣翌日麥成滌與黃宗潤來

觀慨然曰是吾之責也集衆議修諏吉興事建大門仍祭魁星於文星之側刻金甲神像配之池鑿幾尺廣數丈池外屏以照牆繪蛟龍雲雨其上謂士人之決科猶蛟龍之雲雨也工甫竣學使試瓊海口入泮者六人前此未有文運之復興不卽於此基之耶學者涉其津涯循其畔岸由小以幾大因委以溯源以求其全歸之所深維大瀛海命名之意以登瀛洲之選此則余之厚望也夫爰據其實書之并列捐資姓名泐諸貞珉以示後人毋庸胥飭也

特授廣州府花縣學教諭甲午科舉人李向桐拜撰

同治三年歲次甲子秋月立

欽命雷瓊道曉坡周公德政碑記

一瓊郡山多田少年間米穀不敷本地方之用每賴高雷廉各屬接濟一有間斷米價騰貴實有如東坡所云北船不到米如珠是也道光甲申年間十三屬歲均大稔道殣相望公招商出照往各屬採買又通詳兩院所有米船關稅陋規一概裁免有雷州府二蠹胥私索陋規不使米船出口公痛懲究辦商賈聞聲米艘源源而來民得活者以萬萬計於是民皆感激立廟於海門祀之顏曰報恩祠至今俎豆不替茲咸豐庚申歲又大飢若非公之善政垂遺何如前之源源接濟藉蘇饑民此次追思其德請祀名宦所由來也

一瓊臺書院膏火無幾公存心學校以育才爲己任首捐俸金四百兼勸各屬官紳捐題共得白金四千餘元盡心籌畫以足其用由是山長束修生童膏火課額加倍於前有碑爲記又勤於鼓勵飭諸生各造功課程簿一本將按日所讀之書記上每逢月朔清晨迎香畢卽臨書院當堂親給膏火命諸生將程簿呈上親加翻閱隨抽默數行如塾師然諸生懷其德教書院先賢祠中爲之立主奉祀

一瓊州至省垣二千餘里每屆大比寒士赴試者寥寥公會同呂府尊子班張鎮憲清亮舉行賓興禮盛設筵席延請赴試士子贈以卷資衆皆踴躍此科赴試者四

百人費至千金又公因公至雷必親詣雷陽書院與諸生講明實學者或艱於赴試無論鄉會試輒捐廉俸以助行囊其栽培雷瓊兩屬士子有如此者

一瓊州外海內黎不時繹騷然黎人性稚魯頗安耕鑿自客商吏弁盤剝其利遂激之以生變公廉知其弊每遏禍於未萌莅任未幾聞黎歧將爲患訪察之乃崖州營千總王應清放債滋擾公亟行參辦黎疆始得安堵後官防閑畧疏致有黎酋張紅鬚之亂時崖人流離失所每相顧而歎曰若得如我巡道周公在吾儕決不至此是公之留心黎務旣逝而遺恩猶令人追感如此一風憲之官下僚奉以爲儀型者也公觀察雷瓊水淵

自凜自府屬至典史望風畏肅大綱小紀無不奉法而行書所謂正色率下者於公誠不愧云

一府治有普濟堂一項以賑恤孤貧老弱之無告者原歸八家紳士管理不善公飭瓊山縣追其繳出添捐廉俸加額至五十名每名月給口糧錢五百文每年十月各給綿衣一襲另立定章程使管理者不能浸蝕立碑於普濟堂大門以垂永久

一公辦崖州千總王應清暨雷州府謝貴曹安二蠹役兩案固足以安黎庶而悅人心且宦刑部多年深諳申韓之學抉奸摘伏故讞無冤獄各屬讞案有不足以平兩造者力行提訊必期平反而後已至今人尚稱之

一公之立心循循然思誘人以爲善自著學訓二篇其勉人讀書立品之意情見乎詞與朱子學的諸書相爲表裏誠不負名進士之稱又手自書先儒格言鈎摹泐石搨以贈人使人觸目警心其字法併可爲學者法帖用資臨摹此亦勸善之一端

一雷屬洋田萬頃待雨春耕或逢旱甚官紳一體求雨公每聞雷郡少雨輒在瓊設壇虔祝甘霖灌溉雷田其關心農事視雷無異於視瓊也

一遂邑士子赴郡考試屢與衙中書役爭訟成案公婉諭各士子各安本分并嚴飭地方官曰汝豈不是讀書人何乃伸書役而屈士子耶自除衙蠹後士子赴郡試

各得相安無事至今尚載口碑云

例授徵仕郎銓選直隸州分州丁酉拔貢生受業王廷  
傅篆額 附生黃琮潤書丹

雷屬紳士海康縣舉人袁元輔拔貢卓鴻磐何凌雲李  
韶繹增生陳玉璋附生蔡鍾岳遂溪縣附貢陳巨倫廩  
生楊德藻徐聞縣歲貢李蔚霞附生李子卿瓊屬紳士  
瓊山縣舉人李向桐鄭天章拔貢王龍章吳儁王廷傅  
優貢蕭志健歲貢唐亨張書標訓導王子俊光祿署正  
麥成潞中書科中書曾學訓廩生鄭乃綽監生吳琛附  
貢黃琮潤儋州拔貢蒲峻封廩生鄧丞書崖州舉人吉  
大文拔貢孟儒定萬州舉人陳瑄孚拔貢陳繼芳歲貢

瓊山縣志

卷十八

金石

二十五

鍾啓明廩貢陳光潤澄邁縣舉人王乃謙拔貢符克寶  
歲貢王所貴廩生吳中斗文昌縣舉人吳憬平舉人雲  
茂璜恩貢伍元音廩生林之登定安縣舉人張鍾秀拔  
貢莫敬謙恩貢莫性謙廩生吳官政臨高縣拔貢林繡  
裳李恒春恩貢李受采歲貢王定法會同縣舉人楊祚  
昶拔貢楊祚誨廩生楊祚森廩生楊祚珽樂會縣拔貢  
王萬壽歲貢王文龍附生陳文選陵水縣舉人賴國賓  
拔貢楊鳳來廩生賴國平廩生王文輔昌化縣拔貢陳  
登瀛恩貢陳有夏感恩縣拔貢高耀元歲貢陳秉信廩  
生孫應賢

同治三年歲次甲子孟冬月吉日敬立

李門陳烈婦墓誌銘

陳烈婦者吾友李君錦屏之冢媳儒士學超之妻也烈婦性樸謹不苟言笑年十八歸學超能盡婦道得舅姑歡學超生而慧數歲就傳讀書兼人爲文援筆立就尤善小楷有歐陽率更筆意體素癯多病寢成咯血烈婦時侍湯藥伺顏色憂其不永往往私泣淚涔涔滿面未嘗使夫知也李氏家故貧烈婦悉出衣珥典質助藥餌卒罔效遂至不起烈婦晝夜泣粒食不入口妯娌曲慰之烈婦益泣將終七歸其母家與母泣母慰之欲言而泣者再卒不能言母詢之泣益急母招其姑姊妹來勸之烈婦泣姑姊妹亦泣終泣而歸不復言母與姑姊妹

送之門相與泣村之旁觀者皆泣下烈婦行數武輒返顧母泣抵夫家皆盡腫終夜嚶嚶舅姑知其意多方譬喻烈婦止泣爲歡意若稍解者已而家人皆出田遂仰藥而死時年二十一嗟乎余嘗讀古來忠孝節義傳多出於衣冠世族鬚眉男子其表而彰彰者皆世位烜赫聲名籍甚之儔若夫遐陬絕域雖有茹蘖飲冰艱苦以死其泯沒而無聞者不知凡幾也今烈婦生長農家在荒村僻壤間非素聞姆氏之訓又非嫻於詩書之文而習知禮義者也一旦慷慨殉節雖名家士族亦有所不逮非其義烈出於天性能若是乎可聽其湮沒無聞乎丙寅春鄉人士嘉其節請旌於督學賜之額今錦屏不

以余爲不文復乞銘墓余命錦屏言其狀幾欲泣余書之不覺歔歔不置也銘曰蕭艾敷榮兮芝蘭戕鷓鷯匹游兮鵷鸞傷予問閭闔兮何茫茫望高丘兮長太息木連埋兮鳥比翼天長地久兮恨何極松檟兮連蜷魂來兮翩翩銘幽表淑兮山之巔雙棲並宿兮萬斯年敕授徵仕郎候選直隸州州判辛酉科拔貢馮耿光撰并書

同治五年歲次丙寅秋月吉日立

清候選州判恩貢生曾穆堂先生墓銘

穆堂先生余故友也讀書能識大義肝膽照人予肄業瓊臺時與之訂交見其意氣磊落不同時趨促膝談心

瓊山縣志

卷十八

金石

二十七

相視莫逆因詢其淵源所自則告予曰自少失恃始從外祖鄭明經公學繼受從父敬亭明經凡讀一書示以一書精義其音讀若何詁解若何必深求而條貫之書之義理自明及學爲文示以前後淺深反正順逆諸筆法講明意理出言有章方能成文平昔兢兢謹守此法以有今日予聞而歎曰此先生學之所由受知於宗匠馳譽於瓊臺非偶然也嗣後予領鄉薦屢上春官留京寄讀每遇瓊士之試禮部者輒問先生近况知其頤養家居教子訓俗優游文史至老不倦思慕者久之未幾聞其凶耗哭之以詩令嗣春元走書萬里乞文誌幽予何忍辭謹案狀先生爲南豐名族諱光斗字緝熙號穆

堂祖孔進例貢生父日藻照磨銜忠厚傳家義垂方訓有子二長先生次射斗歲貢弱冠試輒冠軍連食廩餼與弟齊名有二難之目孝於事親事續母許孺人得歡心其父喜曰此吾家閔子騫也又爲岳母高孺人請旌建坊得古人表章節義之意其天性之篤倫紀之修有道之君子焉振興祖業以貽後人嘗掌理本圖常住使輸納者免追呼鄉黨有競爭得一言而立解宗族有緩急無不推解周濟之其積德之厚家慶綿長方興未艾方謂老成常在靈光巋然異日歸里便道訪故藉慰離羣索居之思胡天不憖遺竟先予而溘逝也先生終於同治五年□月初十日距生於嘉慶三年二月廿二日壽六

十有九德配高孺人五子長春元次平格三志堅皆太學生四唯一庠生五爵一幼學女四長適郭對瀛次適李庭芳三適謝維藩四適杜堅春元等擇於同治□年□月□日葬於三田村之原銘曰南豐有後喬遷海邦明經蔚起秀出瓊庠經笥是腹文字撐腸不仕於朝而處於鄉南州冠冕有道垂芳山明水秀永護幽藏  
敕授文林郎截選知縣丙午科舉人硯弟黎獻瑞拜撰并書

同治六年歲次丁卯□月吉日

重修東坡書院並泂酌亭記

宋蘇文忠之謫儋耳講學明道教化日興瓊州人文之

盛實自公啟之後公北歸郡人卽公所嘗至之地建爲書院而名曰東坡示不忘也公得雙泉於郡城東北郡守承議郎陸公建亭覆之曰洄酌公所命也嗣後雙泉與亭俱廢學使翁公方綱查金粟泉右有北隅一泉相近在數武內當爲雙泉舊迹復建亭於東坡書院前金粟泉之右補題其額曰洄酌歷年久遠院蕪不治亭亦傾圯丁卯九月余來守茲土深懼遺澤湮廢無以副瓊人思仰之意乃與雲君茂瑞周君書謀修葺而新之旣成二君來請曰願有識余爲公以文章經濟重於當時尊於後世論者於公之學術猶不能無遺議竊嘗反覆乎公之生平而知其必不然也夫使公當日立朝稍事

退默未爲無以自處而公乃汲汲然侃侃然於國家之大未嘗一日釋於心而悶於口泊乎一再貶謫投荒萬里羣小睢伺於僦官屋以居猶謂不可他人處之宜不勝憤懣而公乃怕然順受日與黎子雲輩過從往復無幾微見於辭也此果何所得而然哉其忠君愛國之心隨境安處不以貶謫而易其志惟以炎荒僻處莫非君恩遂以教化瓊人爲己任以詩書啟迪來學以文章誘掖後進爲海外大破天荒厥後之掇巍科登顯仕以文章氣節理學經濟聲施於時則公之有造於瓊若天爲之而實公爲之其心迹可大白於天下後世也則余今日重修公亭惟望瓊之人士讀書稽古以公爲法出則以

所學見諸實用處則以所學修諸於身傳諸其人庶無負景先賢之深意也謹記其事以勸後人

署瓊州府事廉州府知府丹徒戴肇辰謹撰

瓊山學生員後學王之福書

同治七年歲次戊辰仲春月立

### 重修蘇文忠公祠記

維同治七年四月余重修蘇文忠公祠爲之記曰昔宋宣仁后時賈易董敦逸黃慶基先後論文詞譏斥先朝三人皆坐黜及紹聖初御史復以爲言謫公知英州未久貶甯遠軍節度副使惠州安置居三年又貶瓊州別駕安置昌化軍此瓊州蘇文忠公祠之所由昉也或者

謂公文章氣節冠冕百代宦遊所至皆有政績故後人崇德報功所在多有祠廟而公再蒞杭有德於民杭人家有畫像飲食必祝又乞常州居住其後卽卒於常州是皆東南山水名勝之區意百世下公神靈所眷住當在杭州等處而不在瓊海萬里之外予以爲是不然公之於宋猶韓文公之於唐公貶瓊州別駕猶文公之貶潮州刺史公爲潮州韓文公廟碑曰公之神天下如水之在地中無所往而不在而潮人獨信之深思之至熏蒿悽愴若或見之譬若鑿井得水不可以爲水專在是則公之於瓊州亦如是焉而已矣故予於公祠梁桷板楹之撓折瓦蓋級磚之破缺赤白之漫漶不鮮者皆更

作而新之所以見瓊之人思公不置而公之英靈常在也至若助予修祠者王君子俊也例得附書予並記之以勗後之人云

知瓊州府事丹徒戴肇辰謹撰  
候選訓導古珠崖張罔書拜書

同治七年歲次戊辰仲春月吉日立

### 重修邱文莊公祠記

邱文莊公爲有明一代之文臣記誦淹博文章爾雅有吟稿類稿諸刻後提學右參政鄭廷鵠彙合補輯名曰會稿裔孫爾毅又刪定重編世所傳重編瓊臺會稿是也案公相孝宗在宏治四年十月卒宏治八年二月迄今

閱數百年而所爲詩文流傳不廢可謂難矣昔宋眞西山先生大學衍義止於格致誠正修齊未及平治天下之事公撰大學衍義補一百六十卷而治平之道全是公爲大學之功臣也朱子著述繁富文集語錄學者讀之有望洋之嘆公撰朱子學的使朱子之學門徑瞭然是公爲朱子之功臣也故後之學者尊崇先生有補聖經有功道學咸稱之曰瓊山先生況生於瓊州爲郡之鄉先達承學之士知所興起而隆以享祀者也不亦宜乎吾因之有感矣道學之統至孔子而始著顏子曾子子思孟子皆學孔子者也後之學孔子者莫如程朱朱子之學卽孔子之學也竊怪今之人以道學爲空談舉

世不講致朱子之學不絕如縷士習卑陋日甚一日余以爲當此之時設有尊崇朱子之學如文莊其人者其爲世教之幸甚大而人皆不省以此見公之學識非近世儒者所及也余因修公祠縱言及此有世道人心之責者亦庶幾知所取法而於公切尚友之思也歟是爲記

知瓊州府事廉州府知府丹徒戴肇辰識

署臨高縣事候補知縣金筑胡爲黼謹書

同治七年歲次戊辰仲春月立

### 重修海忠介公祠記

海忠介公爲明嘉隆萬歷間名臣案嘉靖四十五年春

二月公上疏極諫世宗欲求長生不視朝政等事帝得疏大怒顧左右趣執之無使遁宦官黃錦在側曰聞此人上疏時市一棺訣妻子童僕亦奔散無留者是不遁也帝默然少頃復讀之爲感動太息留中數月會帝有煩悶疾逮繫論死穆宗嗣位乃釋之至萬歷十五年十月卒公爲治力矯偷惰墨吏望風解印去其卒也士大夫醵金爲斂百姓爲罷市此公之事迹仰見於前史者也迄於今公姓氏流傳在人雖婦人孺子亦皆知之余嘗謂宋明二代忠節之士甚多至於姓名流傳在人婦人孺子皆知在宋包孝肅公在明爲忠介公以公擬孝肅公政績似又過之雖然公之所以致此者非偶然也

公作嚴師戒曰天與爾完節而當完而心毋疚中餒氣毋欽能諱鍼毋外爲強舌而內愧衾影毋洶洶之易操而未流靡淫毋質冕參裳媚恥於中襟毋妻妾宮室動念而自底陸沈有一於此不如鹿死之音公之自警如此此其所以發爲孤忠矢爲介節而爲人所難能者也舊記謂公之忠貞耿介公之學問爲之也余深以其言爲然故重修公祠掇取公自驚之辭於碑後世有欲師公者亦以公之自警者而自警焉可矣是爲記

署廉州府事瓊州府知府丹徒戴肇辰謹識

署臨高縣事候補知縣金筑胡爲黼謹書

同治七年歲次戊辰仲春之月吉日

案戴太守蒞瓊下車伊始觀風取士整頓學校察吏安民一年間重修東坡書院洞酌亭蘇文忠邱文莊海忠介三公祠捐廉爲景賢廩興考試士子有資又捐廉買西郊外金盤地一片俾負郭貧民終塋有地其實心實政卓卓可紀觀三公祠記表章前賢學術經濟文章氣節刻石垂後書碑選楷法之精者鐫字擇工匠之良者最爲寶貴

創建約亭碑

竊以士習民風相維繫者也府治東二十里舊有約亭乾隆初年紳士同建每月朔宣講聖諭廣訓使人目染耳濡畏罪而重犯法間有爭忤則爲之和解而士子詩

文會課亦羣聚其中而肄業焉其有功於士習民風由來久矣厥後老成凋謝亭遂曠廢一椽片石無有存者咸豐壬子癸丑聞瓊郡鄉下土匪潛熾不肖子弟遂乘隙起爲地方蠹民風不靖士氣亦靡父老僉曰舊亭如在則無此患衆韙之因謀重建未果迨丁巳衆以事屬尹東陳孝廉孝廉曰此國家鉅典也且今日急務也余志者已久亟圖之僉曰唯唯爰聯名呈官俯准卽發簿捐題得制錢二千千有奇擇大林墟東爽塏地建堂三楹亭一楹大門三楹左右廊舍庖湑次第漸舉經始於十二月十八日越次年九月落成觀察使者呂星田爲之題額爲約亭卽爲社學由是月朔宣講聖諭者於斯

四時會課詩文者於斯有時遇變而團練鄉勇以防盜緝奸者亦於斯有文事有武備一舉而數美具將士習民風不難烝烝日上矣况其有地左盼七星右聳雙峯後枕溟海前屏陶公遠來衆水迴環屈曲而繞其下蓋五指山脈蜿蜒千數里至此其勢大聚秀氣所鍾必有人才蔚起增光海外者焉是役也歲貢生陳嘉謨附貢生林龍賓張廷松廩生吳魁伍吳蘭修監生林其環亦與有力也而始終其事則尹東孝廉因屬余爲記余嘉孝廉之有志竟成有益於士習民風功匪鮮淺韓昌黎云莫爲之前雖美弗彰莫爲之後雖盛弗傳此之謂歟賜進士出身大理寺卿王映斗撰文

己酉科舉人戶部主事陳毓姜書丹  
大清同治十年太歲辛未春王正月立

黃觀疇先生墓表

吾鄉觀疇先生篤行士也姓黃氏其隸籍於瓊自明進士孟剛公諱重由福建莆田來守瓊州始孟剛公六世祖諱績以理學祀於莆乃唐御史諱滔世稱黃文江先生之十一世孫也黃氏自孟剛公遷瓊成進士者二登賢書者六而憲副諱顯大參諱宏宇大令諱宏憲皆出爲名宦歿祀於鄉尤卓然有表見先生又孟剛公十七世孫也祖邑庠清軒公諱漢章學邃於易父歲貢沙陽公諱畫一兄屈貢生茂醇公諱建策合傳載邑乘嘉慶

六年辛酉二月十二日始生先生於攀丹村先生諱建範字錫侯別字觀疇生而孝友中歲遭母喪哀毀殊至自是事沙陽公益跬步不忍少離沙陽公病痢或曰糞臭可生卽試嘗之旣歿雖終喪每祭必哭事庶母及兄長撫季弟並始終如一蓋天性然也生平自檢甚嚴而待人恒恕然不能干以非禮非公事不入公庭鄉曲有爲不善者不敢與知自五六歲讀四子書至顏淵死數章把卷掩泣旣長貧困力學每夜分蹈水車灌田猶挾書卷然香以照讀爲文尚理法不逐時趨弱冠受知學使顧公元熙補縣學生員文名籍甚從學者多海南東金本薄弟子貧者並薄修亦郤之教人一如其自勵其

講論毋自欺求放心諸義懇切精詳門弟子至今能述而其自治又以主靜爲歸嘗危坐終日以驗喜怒哀樂未發時氣象則所心得必有不能以言傳者矣至其勇於爲義如建書院修縣志聯族譜創賓興皆彰彰然明大體而不僅於小廉曲謹著也自世風日微士不務實行動以才華相詡自欺以欺世盜名放其心以務於利而縱其亡等之欲凡無所利於己卽名義所在亦不復有所措意以視先生吾不知其自問或心愧焉與否而先生之流風餘韻則婦孺皆知又安在不實至而名歸焉矣乎同治元年壬戌朝廷開孝廉方正之科有司以先生應詳文上憲旣以書文索貲寢其事而先生遂以

諸生終矣卒於同治十年辛未五月十八日春秋七十有一先是庚午年先生歸在家太守馮公子立屢造訪勸駕先生辭以年老不就及卒遠近弔者甚衆焉太守亦贈賻親弔先娶林氏無出繼配謝氏子三長佑早歿次佺縣學增生次儁縣學廩生後先生二年歿女二孫五觀澄觀源觀澤觀湖觀淇裔孫十名諸子孫以文行紹其家學而佺篤慎好學尤有先生風卜葬先生於金盤坐艮加寅山之原衆門人屬貞表其墓貞以同鄉後輩遊幕來歸習聞先生篤行若此又不獲顯達安忍不爲昭揭致使潛德幽光不與日星同耀好修之士且無由觀感而興起耶

癸酉科順天舉人同里愚姪陳貞表  
同治十二年歲次癸酉夏月吉日立

瑯環族義田記

冠昏人之始也喪葬人之終也自古在昔先民有作制爲禮以紀綱人道之始終經禮三百曲禮三千總之不離冠昏喪葬數大端而已朱子家禮之成儀禮經傳通解之修尤其彰明較著者也蘇州范文正公仲淹慮貧窮者不能有以及於禮始置義田以贍羣族之人允稱盛事顧文正公之義田不專爲冠昏喪葬置而近世巨族名門則恒汲汲於學田祭田是務而冠禮昏禮以迄喪禮仍聽其人之自爲殊不知禮有吉凶吉莫大於冠

昏凶莫□於喪葬所謂學大本固不外乎此所謂祭亦祇推喪□之意以及於無窮耳吾鄉博養村張姓本義田遺規□一族捐貲置業凡族之娶嫁送終皆取給焉可謂知本務矣夫張氏之先有公藝九世同居問所以能睦族□必曰忍竊意其中當有族正總理大綱時望出入而□瑣瑣細目分教各自整理稽其惰勤不因私而害公式相好而無尤食指旣繁事有難措置處須忍以委曲調濟之家道庶可永和也今此義田之設端始厚終大綱概舉不襲同居之名而同居之規已裕爲一族計知必有聞風興起者禮教之隆風俗之盛詎有艾耶

丙子恩科賜進士鄭天章撰並書  
光緒五年歲次己卯冬月吉日立

陳鑑塘明經墓表

君諱啟綸字一采鑑塘其號也派衍潁水世爲瓊山博茂人因海壩崩圯遷居君堯生敦重與兄文山先生勵志學問年二十五補弟子員不苟訾不苟言語不苟取與雖饘粥僅足自給而高堂侍養旨甘無缺生平勇於赴義往往遇艱鉅衆不能決而能以一言折其衷故修祠宇創賓興圖中善舉悉賴之以成功名蹭蹬年四十始食廩餼以歲貢成均家貧藉友教以濟凶荒誨人循循有規單詞隻義剖析精詳是以大溪以東執經問業

者不下數百人至有從遊十載而不忍去者爲文深入理窟老而彌工由其功力不浪擲於蒙養之年精神不虛施於無益之事故心精力果進而益上而人世豐美懽娛之境曾不得一歷焉則天之阨之卽天之曲成之也嗚呼君之學與行皆足爲士林矜式而顧一生屯遘謂之何哉以光緒六年六月一日卒春秋七十有八諸門人以墓表屬余悼天之懋遺泰山梁木後生小子何所適從也異口輶軒採風表襄陽之耆舊知必有可操券者在  
賜進士出身候補知府歷任柏鄉東光縣知縣同門弟  
邱對欣拜撰

受業廩生林之椿拜書廩生陳鴻球同門人立  
光緒八年歲次壬午秋九月吉旦

清冠書陳明經先生墓誌銘

先生姓陳諱宗虞字才思號冠書瓊山道客村人也少  
而端慤束髮就傅卽知刻苦用功講習時藝文思日進  
年二十四由府案元補弟子員越三年補廩三赴省闈  
三薦不售其時親老在堂同胞兄弟四人伯與叔季相  
繼而逝絕意進取朝夕奉侍不離左右授徒講學藉修  
脯所入以供菽水之歡丙子丁內艱辛巳丁外艱哀毀  
骨立幾至滅性喪葬盡禮無貽後悔至此精神衰耗加  
以課徒勤苦功程嚴督日則講經談藝夜則心齋省私

精力日衰形神疲憊竟與世長辭矣先生才識警敏博  
學能文外伯黃觀疇爲吾鄉宿儒先生從游最久盡得  
所學安徽孫省齋觀察泣瓊課士衡文拔取先生第一  
深相期許勸其赴試以親老辭觀察益重之謂讀書不  
爲利祿之學今難其人不圖於海外見之中年以往潛  
心宋學博覽性理諸書思修明正學垂教將來此願未  
償僅以明經終老一旦捐館凡平昔之仰慕先生尊敬  
先生者無不痛悼焉卒於光緒癸未年十月二十六日  
距生於道光甲午年七月二十一日年僅五十將安葬  
於夏常卿之原門生持行述請予誌幽謹揭其學行勒  
諸貞珉以示不忘銘曰先生之質溫如玉兮先生之學

日不足兮先生之行素敦篤兮先生之遇隨於穆兮典  
型尚在留高躅兮曠代追思訪遺徽者將誰屬兮

賜進士出身籤分福建卽補知縣壬戌同房弟鄭天章  
拜撰并書

光緒九年歲次癸未十二月二十日門人同立

大清戶部四川司主事舉人陳尹東先生墓表

士之讀書立品貴有師資而淵源相接授受不忘雖人  
往風微猶有懷思而不置者其流澤孔長也予自少遊  
學郡垣其最蒙造就者惟陳尹東師迄今化雨春風雖  
與人琴而俱杳而當日教澤之留遺固有銘諸五內而  
不刊者師歸道山久矣其哲嗣廷芬旣營師之墓域乃

以表屬予予以誼本師弟知之有素不敢以不敏辭爰  
爲述其梗概師諱毓姜字子元別字尹東大父文耀正  
直自持忠厚傳家父國琚言行惟謹性愛詩書嘗訓子  
輩曰吾家世淡薄惟讀書可出人頭地師生而岐嶷善  
承先志力學不倦弱冠後遂見賞於宗匠授博士弟子  
員洎後益奮力於文迭膺鶚薦得而復失境遇益困而  
厲志益勤年三十六始食廩餼次年乃舉於鄉亦足見  
食報之有自矣會試屢經房薦俛得俛失遂援例就職  
部曹不能大伸厥志中年以往則志在名山事業乃告  
歸以傳經陶俗爲志凡地方善舉無不當仁不讓而尤  
以獎勸後進爲己任主講雁峰書院十餘載高材生多

遠來請業學舍幾滿師口講指畫循循善誘被其成就者不少至師之爲人秀挺藎立瞻視偉如天性素孝友四歲失恃事父及繼母能先意承意待異母弟魁標友愛有加從兄某蚤卒遺孤數歲師爲撫養成人視同己子而其聯合族人建祠修譜尤獨任其艱居恒慷慨好義家無中產而趨人之急如鷲鳥之發族中貧者有婚葬事輒解囊助毋少靳鄉里中有鼠牙雀角無不以一言而排難解紛且建約亭以敦風化創賓興以惠士林邀圖甲以免徭役種種公益之舉其嘉惠於里閭者深矣身居講席非公事不至偃室纂修邑乘筆削不苟而取予之嚴尤足尚者咸豐季海內用兵久帑藏空虛官

設籌餉局僉舉公爲總理有富戶某賂師百金請免捐師峻拒之邑候陳坤將縣試訪士於師師薦能文者數人而不及己之子弟又族子某赴海口大客店購貨物過宿驟得暴病卒報至衆咸慙息興訟師曰死生有命奈何以卵毛鉤鬚事構禍後店主聞之輒向人稱師盛德不置其他制行多類此悉數之不能終也平日雄於爲文而勤於誨人以驥聲魯鈍無似於詩文一道頗窺門徑者山得師之教也師顯後祖父均贈奉直大夫大母吳氏母氏林贈宜人師卒於同治辛未年距生於嘉慶癸酉年壽五十九卜葬郡東二十里許坡雲邨之原配曾氏封宜人側室蒙氏生二長嫡出廷芬歲貢生次

庶出廷莊例貢孫三女三所娶所適皆名族光緒十二年季春門下士驥聲爲文表其墓並係以銘曰猗與吾師文中之雄兮崛起蝸牛之廬見賞於哲匠宗工兮名列巍科官居郎署不爲不焱焱隆隆兮胡爲不奮扶搖之翮而乃鳥倦知還竟以名山講席終兮昔朱考亭鹿洞有遺規陸子靜鵞湖有教澤吁嗟吾師庶幾髣髴其芳踪兮恒幹不可留令名永無窮兮坡雲之原有墳巍然千秋萬歲過者下曰此爲有道之幽宮兮

候選直隸州州判癸酉科拔貢生受業馮驥聲謹撰并書

光緒十一年歲次乙酉春三月立

儒良學宮碑記

儒良村舊有學宮一座祀至聖先師由來已久自同治乙丑迄光緒甲申協力經營建上下二座左右兩廊次置產業以爲延師奉祀入學出試之費前人之爲後人計至深遠矣夫學宮建則肄業有所學田置則脩脯有資萃子弟之俊秀者讀書其中奉至聖先師以爲法以顏曾思孟周程朱張爲指南嚴立學規法良意美然猶慮學者有其名而無其實也學之實奈何曰學以爲己也學以明倫也聖賢教人知行並進知由讀書窮理其功在博學審問慎思明辨乃能盡爲己之學也行由身體力行其實踐在親義別序信而能盡明倫之學也大學

之言明新中庸之言誠明孟子之言仁義言雖殊而理則一周子之言誠程子之言敬張子之言禮朱子之言敬其言皆足發明四書之精義也學者審端用力毋迷其途毋馳其效毋輟其功熟讀精思循序漸進卽知卽行庶不貧前人殷殷立學之意斯爲得之若夫讀書有得施爲經濟此順時以俟聽其自然有志之士切莫以功名爲急而以學成於己者躬行於倫常之地不愧不忤成其爲人是吾所厚望也夫

同邑賜進士鄭天章謹撰並書

光緒十三年歲次丁亥仲冬月念日立

張景山先生墓誌銘

瓊山縣志

卷十八

金石

四十三

余向慕濱涯張氏爲瓊臺望族代有聞人歲丁亥嚴生進修黃生雲興等請余銘張先生景山墓先生余世交友也謹按其先世自諱賢諱德諱善教三鄉賢公而後世代流傳武緯文經簪纓不替迨先生十九世矣先生諱松茂號景山侑生瑞魚公男也瑞魚公天性溫恭樂善好施傳載邑乘生三男長椿茂邑庠生次應揚先生其季也先生生而端慧氣體堅固聲如洪鐘少與母兄依未久母與兄亦相繼逝撫諸孤姪竭力完婚課以誦讀不異己子先生爲學初承父兄庭訓繼從唐先生亨黃先生建範勵志精勤日有程課爲文理脉清真昌明博大有先正遺規同治丙寅領青衿光緒戊寅食廩餼

雖家計既繁猶殷殷課子姪輩以詩書授徒講學從遊口多彌加勤日與諸生質疑辨難娓娓終日絕不憚煩束修不問多寡而於貧者每却勿取性慷慨樂善雖窘甚不可干以私有義舉必傾囊助成之遐邇欽服有事質正必委曲明諭莫不各得其平以去有犯義者必正色排之然舊惡不念故怨者希至有爲不善者惟恐其見聞焉迹其平生爲人志堅思苦嚴於束躬而恕於接物礪廉隅安境遇勤討論重然諾年未週甲竟以遘疾終時光緒癸未年十月 日距生於道光甲午年 月 日  
口享年五十歲娶唐氏生三男長步瀛廩生次步晶  
三步青附生茲將卜塋於麥茂之原爲書梗概泐諸貞

珉以俟後之採訪者銘曰清河望族瓊涯之濱請纓樹績代挺偉人先生繼起揆藻儒紳品端行卓不愧先民賜同進士出身籤分福建知縣愚弟鄭天章撰并書  
光緒十四年歲次戊子冬月立

皇清鄭倬雲先生墓表

先生鄭氏諱天章字倬雲世居瓊山鳳樓圖那秫村先世自明以來讀書起家領鄉薦選明經者代有其人曾祖宦祖文冠太學生父德元歲貢皆耕讀家術鄉黨矜式先生少承庭訓有志宋儒之學長從叔祖文彩學有聞於時文彩以名孝廉主雁峯講席從遊者衆獨賞其文學有吾家千里駒之譽年弱冠應童試邑侯金樹本

拔取前列許爲遠到之器遂補弟子員旋食廩餼歲已未丁外艱喪盡古禮壬戌恩科舉於鄉丙子登進士以母老不仕循陔養親奉侍備至撫孤姪如己出宗族鄉黨無間人言家素貧藉束脩以供菽水主講澄江麗澤雁峯蘇泉四書院聘金之外一介不取諸生以贄見者亦辭不受故廉介之名卽孺婦亦知之聞先生之風可以興矣嘗自言初學王陽明愛其痛快直截知行合一能救學者因循之失久之知其學近禪末流有弊因返求程朱之學以居敬窮理爲要以躬行實踐爲歸矩步規行率由禮法粹然爲海外之眞儒焉及門勸其著書以訓後學先生曰論語言博約知行中庸言學問思辨

篤行孟子言知言養氣存心養性其言雖殊其理則一得程朱注釋而發明之如日中天已無疑義何煩著作耳學者毋迷其途毋輟其功熟讀精思循序以進久之自能深造自得也若世俗記誦詞章之學乃利祿之學非身心之學也虛無寂滅之學亦異端之學非德性之學也辨其似是而非審端用力堅苦自持庶不失程朱誨人諄諄之深意此皆本生平所學以示人其宗旨之正存養之深已可知矣先生於程朱著述採購無遺誦法其言亦終身不輟日有程月有記撮其要而錄之無間寒暑編爲程朱粹言示弟子以簡易之法藏諸於家其爲人顛直耿介與取辭受必嚴非禮躬行節儉布衣

蔬食淡泊自安而修金所餘悉舉以周窮困與人無城  
府心地坦直率真視貧賤之人時加親愛人有過失則  
必面責之有時與當道言地方利病民生疾苦剴切指  
陳無所忌諱雖觸官司之怒不計也正直自遂不存偏  
私當於古人中求之卒於光緒戊子年七月初五日午時距生  
於道光癸未年五月初六日未時壽享六十六卜葬於本里後  
坡之原一里許係先生自擇預作生墳者配妣枉孺人  
庶鄭氏皆無出庶章氏生男二長里銘自幼聰敏博學  
能文屢次試列前茅以丁內艱未及補廩次里鑑附生  
能讀父書傳其家學閱二年門人王永椿等以先生行  
述請表其阡因舉其論學之言與其氣節之嚴正卓卓

大者勒諸貞珉後之學者可知所取法焉

賜進士出身卽用知府歷任柏鄉東光縣知縣世愚弟  
邱對欣撰文受業王永椿篆額 王國棟書丹  
光緒十六年歲次庚寅冬月門人同立

三公祠仰賢社寶興序

郡西北隅有三公祠焉半郭半村具林木清幽之趣其  
地傍邱海二公故里蓋爲褒德錄賢故也歲久祠宇傾  
頹太守徐公捐廉而重新之辛卯落成<sup>鱣</sup>時下榻其間  
慨然有春露秋霜之感爰偕王君文憲蘇君建龍集同志  
而飲爲立社顏之曰仰賢竊有取乎高山仰止景行行  
止之意夫瓊地僻南荒唐宋以來僅爲流竄囚奴之地

自蘇文忠公謫此講學明道而風化日新明邱海二公接踵而作文章氣節炳若日星而吾瓊遂屹然與中州并重噫瓊非三公則是邦之淪於被髮左衽者直不知凡幾年矣遑計氣類相感如鶴鳴而子和龍興而致雲哉迄今俛仰蒼茫餘韻流風湛人肺腑社成每歲涓於重陽日肅奉祠事復緣其額而廣爲賓興俾學者資斧有藉興起聞風景三公之遺徽振三公之墜緒涵濡漸漬諒必有仰其賢而至其賢者未可知也爰爲之序深有望於後人

後學楊慶鱣撰

光緒十七年歲次辛卯冬月吉日立

黃述人先生墓誌銘

嗚呼棟何以銘吾師哉自少忝列門牆親承訓誨其獲益於師者備至而師之屬望於棟者彌殷虛度光陰不能成立心滋愧焉豈忍令吾師遺言懿行湮沒不傳哉師姓黃諱偁字揚可號述人世居郡城東攀丹邨爲定侯太夫子仲嗣太夫子文章德行望重當時設教二十餘年及門多知名士師穎悟過人甫成童五經成誦長通史子喜讀漢魏唐宋古文辭能知宗法所在爲文援筆立就日十數菽爲吾瓊百年來所僅見一試遂冠童軍受知於林勿邨太守太守當代宗匠所拔盡一時之秀而以師爲翹楚入庠食餼文名日噪凡縉紳大夫識

與不識一見其文無不歎爲異才九試秋闈俛得俛失卒以明經終老人咸爲師惜師則曰讀書非爲科名計也其教人勉以立心制行嘗舉孟子求放心之說以示棟曰求放心之功不外乎敬程子云入道莫如敬又云主一無適所謂敬者主一之謂敬所謂一者無適之謂一朱子云整齊嚴肅無非示人以敬敬則靜存動察心自不放此程子教人之法書之座右觸目警心可爲操存之一助迄今回憶師言猶置身侍側時也師於羣經皆通而專精乎易由義理以窮象數爻辰消息之原互體卦變之說旁通反對之義皆能深究其理棟有時質疑剖析釋義其於經學得之師訓者多嗟乎世之言學

者往往偏於所習考究乎一名一物求勝古人至義理之大身心性命之要輒鄙爲空疏而不道舍本而趨末語小而昧大學術所關非細故也若吾師者經學兼通漢宋理學謹守程朱無世俗偏執之弊謂之通儒誠無愧焉師事親孝遇有疾病親侍湯藥衣不解帶親歿葬祭一遵古禮不延僧道每逢忌日猶有戚容事叔父錫侯先生如其父與兄毅可弟直可堂弟弼可灼可諸先生怡怡和樂一堂之上書聲琅琅雖冬餘春初不廢討論其家風之厚庭訓之長概可知也至其清門望族持己待人家傳已詳故不著師生於道光己丑年十月初五日辰時終於光緒乙酉年三月初一日酉時年五十

有七德配謝孺人生子四長觀瀛次觀澍邑庠次觀潤次觀治郡庠皆安貧讀書克紹家學女五孫六光緒乙未年冬十月廿五日卜葬龍岐坡之原同門樹貞珉勒名碑陰乃爲銘曰海邦師表江夏無雙秉質醇懿世爲儒宗明道翼教履禮禋躬先民是程學者景從詩書食報流澤無窮如水之長如山之崇高風長在有此幽宮受業優貢生王國棟撰文 受業副貢生王樹藩隸額受業廩生劉詔球書丹

唐鷺洲先生墓誌銘

光緒二十一年歲次乙未冬月門人同立

君諱聲振字玉堂號鷺洲瓊山攀丹村人宋景聲公田

瓊山縣志

卷十八

金石

四十九

廣西興安縣官於瓊因而家焉科甲蟬聯世稱巨族簪纓鵲起代有傳人如明西洲公巍然傑出爲瓊南冠冕之望縣延至君曾祖與祖均業岐黃著譽清白父克甫公幼習舉業早以療疾棄君麟士嗜學須捷棲貧爲黃定侯錫侯兩先生高第咸豐丁巳受知於呂移村太守殷述齋文宗以府試前列充縣學諸生屢躋秋闈援例出貢科名淹滯姑不具論其天性肫誠人欽□摯則非世俗所可比倫焉蚤時椿萱並老衰病頻仍甘旨拮据於前湯藥不時以繼下意承懽側崔邠之帽晨羞夕膳潔東哲之供內行之敦族鄰無間顧資生苦無長策卜歲祇在硯田講鐘肆鼓人仰經師先識後文獨標指授

既立士林之鵠不爭束修之羊時學者不大都景仰  
龍門爭趨鹿洞矣乎他若交友以信金石不渝見義必  
爲權衡悉當居鄉有彥方之風爲善得東平之樂□亮  
伯孝廉嘗稱爲今之古人蓋有以知其真矣烏虜老淚  
波難斜光暝易蕙凋霜夕蘭敗風晨遽竟以光緒甲申  
年卒春秋六十有四德配馮孺人敬事尊嫜言不出梱  
勤修內政健可持門卒六十二歲後君一年子二孫三  
長名鵬與孫鏡輝騰輝俱早逝次丙德庠生孫輝極尚  
幼類皆世其家學茲將卜葬於大園村東之原門人等  
豫以狀乞銘銘曰珠沈淵玉韞璞伏處傳經道自足鬱  
鬱佳城於茲吉卜爲善獲福杳難知子子孫孫世式穀

賜進士出身卽補知府前柏鄉縣知縣姻世弟邱對欣  
拜手撰文

朝考二等卽選訓導甲午科優貢世愚姪王國棟拜書  
篆額

光緒二十三年歲次丙申仲冬月門人來會葬悉勒名  
於石

王氏大宗祠烝嘗田記

考之禮圭田無征孔疏謂圭絜白也言卿大夫德行絜  
白而後可以承祭又云士大夫宗廟之器有田則祭無  
田則薦是先王制禮自諸侯以降卿士大夫皆得立廟  
皆有祭田備禮器以祀其祖考典至鉅也秦漢以來士

無世祿禮制莫修我先代雖封琅邪太原二郡公家廟之立不立漢史莫詳無由考其儀制爰逮唐宋五品以上通得立廟其時烏丸王氏官侍中時以不營私廟爲法司所糾宋文潞公奏立廟河南則知唐宋之世多立家廟我先代相唐十三人相宋不下十人其廟制之隆祭器之備所謂禮莫大於祭祀莫重於享親者於是乎在豈非世祿不行而私置祭田禮備器數亦是先王之遺法爲子孫者所宜急講也哉吾瓊王氏遷來南宋琅邪太原二郡俱有其人溯自右軍始祖遷於浙後遷於江右遷於閩粵由閩遷瓊者皆琅邪之支派也自漢徵君傳自河汾河汾十餘傳至晉國晉國五傳扈駕南遷

分居江浙由江浙遷粵遷瓊者皆太原之支派也子姓之蕃衍族居之散處環瓊十三屬不下數百村小宗之祠各鄉皆有而大宗之廟缺焉同治年間秀升族伯創爲此舉家億國康乃謙希周守謙瑞麟諸族伯贊成之卜地於郡城東街經營二年經費二萬始獲落成可謂勞矣琅邪之宗祀右軍始祖右軍之後若文憲文義文成諸祖以次列焉太原之宗祀河汾祖河汾之後若晉國魏國諸祖亦以次列焉瓊之各支祖分列東西次以年代臨上質旁昭穆秩然禮制遵行歲時將事合族子弟趨蹌於三槐堂中講訓族之遺規紹傳家之正學其在是也而又慮其不能經久也光緒三年出其餘資置

和舍田庄又置官隆圖青草村田庄以爲烝嘗祭費存  
其有餘以培祖業後嗣之子孫當知前人手創艱難或  
遲之二十餘年始獲有此祭田以留貽於後自今以往  
踵而理之蓄積而推廣之增置膏腴善爲經紀俾讀書  
者有資於是科舉者有資於是養育人才大興宗姓遠  
以紹琅邪太原之遺澤近以傳河汾姚江之家風理學  
經濟光垂史策是不能無厚望於後起也其祭田畝數  
價值多少附刻碑後

裔孫國棟拜撰並書

光緒二十三年歲次丁酉夏月之吉立

馮公增修閘隄碑

瓊山縣志

卷十八

金石

五十二

丁酉春增修閘隄增修者誰雷瓊道馮公也公篆光遙  
字仲梓江蘇陽湖縣人由翰林簡放道員蒞任二年鳩  
工增修因舊隄爲河水冲圯閘亦傾塌瓊壁等呈請增  
修俯允批准將前收河道所存息銀加捐清俸并另籌  
鉅款派員協同紳耆監工購石四千有奇概行改作閘  
之卑者崇之隄之狹者廣之繼長增高完美堅固由是  
資灌溉便往來莫不歌馮公之功頌馮公之德謹書其  
事勒諸貞珉用垂不朽

光緒二十三年孟夏月督理紳士孫瓊璧唐聲教陳家  
修耆民孫繩敏瞿光杰等合同邑士民立石

皇清例封徵仕郎附貢生愛塘曾先生墓表

歲在戊戌棟主挈經講席時與表叔鏡芙孝廉過從譚  
□論學相得甚驩鏡芙屬棟表其兄愛塘先生之墓棟  
辭曰昔在宋明道程子墓其弟伊川撰表眉山蘇長公  
墓其弟穎濱撰銘自爲表墓更見友愛情誼鏡芙以己  
無伊川穎濱之才學敢以相煩謹案狀先生諱慕顏字  
希韓又字愛塘同邑邁德人父諱射斗字劍泉歲貢生  
子五先生爲長尊翁年逾四十始得先生鍾愛之自少  
教之誦讀督責嚴厲如讀書不能爛熟不明講義毋稍  
假顏色故先生學識日進得諸庭訓爲多性至孝事親  
能得歡心宗族鄉黨無間人言先生母林太孺人以產  
難下世尊翁抱潘黃門之戚時不去懷先生入則含恤

出則承顏哀悼之情因之稍釋居無何族中械鬥事起  
株累尊翁倉皇出走家貲罄盡先生隨侍左右備具藁  
簞艱危萬狀不敢告勞尊翁雖處患難之中督課諸子  
不遺餘力嘗誨先生曰古人處顛沛流離之時不忘學  
問我家雖破正宜勉疆力學徐以雪不白之冤訟事略  
解偕三弟澹腴出應試同受知於胡學使瑞瀾同案入  
庠未幾澹腴讀書過勞以病瘵卒尊翁痛切西河幾至  
喪明先生因自課弟鏡芙子暉春朝夕劬學藉此以慰  
親心歲丙子尊翁棄養葬祭盡禮必誠必慎與諸弟分  
爨推肥取瘦有薛包風先生備歷艱辛家已中落然見  
義勇爲在鄉則創建合族祖祠以承先志族中至今稱

之邑中舉秀才者初謁學師有冊金抑勒之苦難以言情先生集闔邑官紳酌定章程統籌經費設局致送士子若釋重負稱道勿衰生平勤苦潛研記誦淹博不沾沾於帖括文高遇蹇試屢不遇戊子試京兆已得復失人皆扼腕先生曰自古懷才不遇代不乏人若邵青門王齋東黃仲則汪魚亭諸名士名動公卿輒不一遇予之才學萬難上希前人屢遭擯斥乃分之宜其見識曠達有如此者中年以往期望子弟彌切歲丙申暉春登拔科先生已遭疾次年弟鏡芙領鄉解而先生已不及見矣卒於丙申年冬月距生於道光辛丑年壽五十有六配鄭氏同邑封川教諭乃縉公女子一暉春拔貢生

續娶王氏副室唐氏生子三士升士書士善女一適定安莫姓孫四祥頤祥朋祥順祥顯俱幼學卜葬於本村之南三里許邁陳坡之原銘曰瓊臺鼎族世推南豐先生特起孝慈友恭潛思載籍蔚爲文雄屢經禍患勁草疾風不遇於時不顯於躬階培玉樹秀出南中今卜兆域佳氣鬱葱銘鐫樂石永護幽宮  
特授樂昌學訓導甲午科優貢表姪王國棟拜撰並書  
光緒二十四年歲次己亥冬月吉旦立

清欽賜副貢徐先生衡卿墓表

先生徐姓榜名鑑又名正功字成一號衡卿邑之演順三國昌城村人也祖父皆讀書好義有聲於時先生昆

弟五人齒居長事父母能得歡心同堂中怡怡如也弱冠後劬勞勿倦工制藝補邑弟子員辛酉科鄉試薦而勿售中年頗嗜酒一樽自酌忘懷得失夙習醫靈素諸書靡不研究有就診者輒應手愈生平性情和藹解難排紛鄉閭翁服卒年八十三配黃安人白首相莊有梁孟風嗣君開岐國學生丁酉科大吏以先生耆年言於朝欽賜副貢生子亦是科領鄉解嗣君以予辱聯譜誼屬表其墓因揭先生行事之卓卓者於碑庶後人知之云

同邑丁酉科解元曾對顏拜撰並書

遷建蘇泉書院記

瓊山縣志

卷十八

金石

五十五

國家培育人才賴有庠序書院又以輔庠序所未逮者也自郡會至郡邑莫不有學官卽莫不有書院瓊郡處五嶺極南孤懸海外邈輿圖之垂盡撐一島於滄溟荒僻鄙陋幾等異域余奉命來守是邦始而懼焉繼而安焉終而喜焉其懼者何郡爲粵東炎徼尙黎桀驚瘴癘侵淫在宋尚爲竄謫之區安得不悚惶焉其安者何人心渾樸古無戰場魏晉以後中原多故衣冠世族紛紛航海而來聚廬託處居然海外桃源俗美風淳不聞囂競其樸而愿者終身不到城邑其秀而文者學術不詡新奇無懷氏之民歟葛天氏之民歟余可以不勞而治歟其喜也何地盡氣脉不斷域小而氣局斯全凡天下

所常有者茲無不有歲有八蠶之繭田有數種之禾奇香異產品物瑰瑋而且文莊忠介代有偉人其理學經濟恒足頡頏海內迄今時局變遷勢蹙財匱猶復學校如林誦絃弗輟明太祖所謂南溟奇甸俗稱爲海濱鄒魯洵不誣也豈得以荒服目之乎旣而公牘餘暇散步東郊思人物於全盛訪勝境於巖阿路曲山迴面城臨澗有樓巍然者五公精舍也樓祀唐李贊皇宋李忠定趙忠簡李莊簡胡忠簡五賢樓之東有蘇文忠公祠祠旁卽浮粟泉泉上有屋數楹顏之曰蘇泉書院講舍蕭疏山花歷亂父老告予曰此闔郡之書院也予曰噫闔郡規模乃僅若是哉將何以造就多士哉歸而詢諸院

長粘孝廉孝廉曰前人建造多仿名勝今昔殊時滄桑變易勝蹟也而荒涼中之矣屢議遷建籌措維艱興廢舉墜以俟君子余曰興學立教責在守土籌款營建予之責也時予方捐廉以助海口平糶卽先出俸銀四百元鳩工庀材卜築於郡東前明歐陽郡守遺愛祠之右士民踴躍捐輸恐後不閱月集款數千元因爲親臨一度與諸紳相機振作中建書樓講堂兩大座各五楹崇廓閎耀軒櫺洞開內設蘇文忠公祠崇修歐陽遺愛祠配以前賢祠各三楹齋二間外建魁星樓刻成德達村兩門環以照牆繪蛟龍雲雨其上示學者以變化氣質規制旣備僉以院名爲請予曰自蘇文忠蒞瓊姜君

弼受業始登科甲瓊之學多本於蘇且院有井孟子云源泉混混不舍晝夜盈科而後進放乎四海有本者如是學者苟探原竟委處則厲名節於廉隅懷清履潔出則發經綸爲雷雨行道濟時可大可久之功胥可於源源本本卜之因仍名曰蘇泉書院興工於己亥孟冬落成於辛丑季夏共費白金二千七百有奇並銅錢五千六百五十八千文其助工籌捐督理工程者粘孝廉世瑄黃工部遠謨張廣文瑞鏡等之力也工方竣鄉試獲雋者四人近所罕有由是文教昌明文風蒸蒸日上多士濟濟黼黻王庭予有厚望焉現奉大府催將書院改辦學堂經費支絀因籌撥公項外再捐廉銀一千元發

商生息每年由瓊山縣收息解府撥充學堂經費以垂久遠爰敘其畧并將捐輸名數考課條親泐諸貞珉俾後人風其義而隨時興舉焉毋庸臆飭也

賜進士出身花翎三品銜知瓊州府事劉尚倫撰并書光緒三十年歲次甲辰春月吉旦刊

愛生醫院敘

攷之周禮天官有醫師掌醫之政令疾醫堂養萬民之疾病以五味五穀五藥養其病以五氣五聲五色視其死生兩之以九竅之變參之以五臟之動凡民有疾病者分而治之是爲醫官之權輿秦漢有太醫令丞隋唐置太醫署宋設翰林醫官院明初設醫學提舉司改爲

醫監後始爲院並設惠民藥局醫學訓科以分治之國朝有太醫院使院判教習諸官設有京師各行省未有專官誠以醫者方術之士生人之所用人人得而學之學而有成自可行其術以救世不必分設官師尊其職分限以地方使民緩急不能相濟此聖朝善體人情之至意也近年督粵諸大憲推朝廷養民之道謀之紳商共集巨款建廣濟醫院於羊城診視有醫施藥有所養病有舍供使有人舉生人之身心性命無不深爲體之曲爲全之俾民無天札共遂生成此醫院之設有益人濟世之功上足補朝廷休養所不及下足救生民危急所必需醫國之道其在是矣瓊州僻處海濱南方瘴癘

民多疾病瘠貧者無以醫之恐有負視民如傷之隱亦無由登斯民於仁壽之天坐擁專城有所不忍自馮仲梓廉訪持節蒞瓊與紳商吳爲熙等謀建愛生醫院於郡垣捐俸金銀一千兩撥稅務銀二百兩各紳商捐銀一千餘兩其事始能舉行予來守是邦每月捐銀七兩以充經費惜捐項無多醫費有需而建造未卜今邑紳商王國棟吳爲熙林新華鍾宏盛張煥詩同三行等同心協力廣勸籤題粘璞齋孝廉等稟請信觀察撥倉廩舊地改造醫院經始於夏季落成於冬月費銀三千有餘是役也非諸紳任勞任怨力肩其任不能成此盛舉可謂有志之士於地方多裨益也然予觀醫院之設

不能無感然於心也夫瓊州之大病莫患於元氣漸消而生機日剝當此海邦多事外患交侵病卽生於虛耗籌緝捕而民病於攤開票廠而民病於賭增釐稅而民病於繁重行房捐而民病於追呼憂盜賊之交攻而民病於侵掠遭荒歉之饑饉而民病於凍餒兼之天有時侵人有時災剝喪交危脂膏已竭此生機所以日蹙元氣不能復全至形爲傷熱傷寒虛損虛耗諸症皆其顯然者也予也忝有牧民之責痛癢相關洞悉癥結知其受病之由與成病之故愧非國手不能立起瘡痍所望同志諸君隨時補救去一切剝削侵耗之弊轉危爲安撫循而休恤之徐以復其元氣暢其生機俾斯民安於

衽席是區區厚望之意也所有捐題附名之後以爲後之爲善者勸

賜進士出身花翎三品銜知瓊州府事劉尚倫撰

光緒三十年歲次甲辰夏月立

楊大宗祠遷移碑記

祠建於瓊臺西偏歷有年矣雖無金浮玉映雲霞邳張而崇墉縮霤亦足以蔽風雨而妥先靈乙巳冬漁川吳觀察緣瓊臺故址改建瓊崖中學擬購吾祠以增校舍遷龜山公栗主於北郭之第一樓鱣侃侃力爭籌以李公去思亭互易夫去思亭爲李前鎮部弁釀築其室宇軒敞儼駕吾祠而上之祠遷後諭永借爲文武到任行

台館金概豁鱸忖易地遷祠原爲不得已計設任強賓  
奪主勢必久假不歸再四磋商定案而鴻基式廓煥然  
一新噫是非先祖之靈爽所呵護耶吾家清白開基名  
賢碩彥代不乏人然而支分派別本源既遠情誼益疎  
若非祠祭巍存恐易世後有莫識其粉榆者鱸不忖螳  
力妄輒當車冀以一綫繩繩屹百年鼎鼎甚願族之人  
紹弓箕承堂構有以鑒吾之苦衷而副乎廟貌崇尊之  
義是爲記

裔孫慶鱸撰

光緒三十二年歲次丙午秋月立

清署化州訓導馮德驥墓詩碑

瓊山縣志

卷十八

金石

六十

南溟奇甸方千里靈秀蓄自洪荒始鬱久必發誕英奇  
丘海兩賢相繼起文章氣節各千秋盛名有如雷貫耳  
嗟公之歿數百年以時考之則可矣我師生長二公鄉  
年少媵修不自棄礪行素佩嚴師戒講學闡明西山義  
曾謁崇祠嘆傾頽統籌經費重修治規模輪輿復舊觀  
足徵景仰先哲意師法所在謹率由最恥□然媚於世  
能以節儉養廉隅每食惟欖與鹽豉遺風眞乃忠介留  
後人有爲亦若是惜哉終老一明經斧柯無由及鋒試  
勛業因此讓古人婦孺何從識姓字詎知廊廟與山林  
用行舍藏可易地自歸道山十餘載猶憶當年嚴責備  
勗我爲學戒浮誇丘海可師當立志我來今日望松楸

嶺雲自封溪水駛數尺峩峩馬鬣封英魂千載藏幽邃  
敬獻蕪詞酌一杯臨風空灑西州淚

福建補用府經歷丙午科優貢受業丁苑瓊拜撰  
署崖州都司世襲雲騎尉廩貢受業陳姚熙拜書  
光緒三十四年歲次戊申仲冬月門人仝立

清歲貢生唐君墓誌銘

距郡治東一里攀丹村明少司農西洲先生故里有君子儒焉姓唐名聲教字冕堂號小亭少司農裔也司農與伯視侍御汝濟公以氣節文章重天下乘有載史有書崇祀鄉賢名宦代有聞人君祖立齋父稱亭以行誼重鄉里昆弟四人君居次勝衣就傅有岐嶷姿弱冠後

瓊山縣志

卷十八

金石

又六十

隸郡學籍繼以第一食餼壬辰年選歲貢銓訓導考君生平屢赴秋闈不遇君嘗曰功名身外物耳人莫重性分內事吁君子之言歟事稱亭公盡孝疾侍湯藥日不交睫居憂盡哀太宜人棄養塋祭一如公蓋其天性然也家傳清白嘗館郡垣課徒博館粟爲奉養資文詞風義爲後進矜式弟聲駿子名鴻姪丙德均進庠皆君裁成力也雷瓊道林耳其賢委瓊臺監學兼五公精舍任事三年以年老有疾奄然賓館時光緒二十九年正月廿五日壽享六十九配宜人鄭氏有淑德子二長名鴻次名鸞均讀書女二適名門孫四宸宏寅富俱幼學塋邁盈之原乞余銘幽銘曰瓊城之東司農宅第有隱君

子前賢華裔匪爵而榮匪祿而豐彼何人斯惟善之從善則不遺行率爾祖猗與西洲篤天之祐有茲象賢斬碑不書後之君子謂我何如

知瓊山縣事癸酉科舉人嶠西同宗盛松撰并書

光緒三十四年歲次戊申仲冬月立

皇清誥贈朝議大夫亨嘉王君暨配旌表節孝孫太恭人合塋墓誌銘

君諱沂會字亨嘉瓊山縣人曾祖諱家錫太學生敕封文林郎祖諱承烈嘉慶辛酉舉人旌舉孝廉方正父諱廷佶本生父諱廷信俱贈奉政大夫生道光十四年甲午三月十二日卒同治三年甲子春秋三十越三年丁

卯二月卜塋郡城北郊米舖村園配孫氏同邑諱纘緒之女生道光乙未年八月初五以宣統元年三月朔日終於里第享年七十有五六月五日啟兆合窆禮也孤國憲先期以書抵鍾穎乞志其墓曰先君無祿早世國憲孤苦賴母氏恩勤鞠育每述先君遺行窮約刻勵學業未成疊遭內外親喪盡哀盡禮三年之中竹笠芒屨周覽山巔水涯間求得吉壤七喪畢塋而心力瘁矣先君塋逾四十年志石未備今遭先慈之喪亟待泐貞珉以表苦節先慈幼嫻禮訓爲外祖父母鍾愛于歸逮事舅姑曲意承志既遭先君大故養老字幼飲冰茹藥不言勞瘁督課尤不少假顏色嘗詔國憲曰汝父一生攻

苦賚志以歿汝能力學無墜先德方慰遺憾生平荆布粗糲而秉性仁慈振人之急若恐不逮親黨有受其惠而不知者國憲負笈從師得窺古人爲學門徑以優行貢成均諸孫以次成立皆賴太恭人積和蘊祥作則於家垂祉於後憾不能報劬勞於萬一也鍾穎自來海南卽聞詩禮家有瓊山王氏及與明經相友善知母慈子孝一門豫順恒敬歎之今者窀穸妥侑吾知積善餘慶必有貽子孫無疆之福者子二國憲甲午優貢樂昌縣訓導加運同銜國崇太學生出繼鶴田伯祖後女一適鄭將茂孫三政附貢生優級師範生教方言專門學生敏附生孫女二曾孫定猷曾孫女四銘曰三槐蔭翳布

護舍城根深實茂篤生俊英心君之行冰淨雪明耳君之名山高水清珠沈騰媚王折曜精青箱纂業銓錫競爭懿矣恭人笥竹釵荆孝儷班惠節媿楚貞昌期嘉偶柔順以成齊賢慈母福壽且亨奇甸藏秀神墩闕瑩筮宅開隧敞地經營楸梧鬱鬱松柏菁菁奕葉載德永保簪纓

誥授資政大夫二品銜瓊崖兵備道虞山俞鍾穎撰文  
丁酉科解元表弟曾對顏篆額

己酉恩科舉人姻姪林之椿書丹

宣統二年歲在庚戌夏月吉日立

誥封資政大夫候選同知鍾實卿封翁

誥封二品夫人

林太夫合墓誌銘

封翁鍾姓諱光輝字實卿號志榮先世由閩之莆田來瓊古籍瓊山居福同里累代業農潛德弗耀封翁少有至性夙稟異姿弋志詩書無間乎寒暑躬行孝弟常侍乎庭幃以爲服賈可以養親懋遷亦云繼志出門營業航海遠遊行蹤徧乎日南轉徙周乎星架知洋人之商務工藝爲先慨華僑之見欺法律未學素志莫遂決計歸來與世無爭過庭垂訓教長嗣君錦泉精研律學兼課洋文通蘇志干德之家言識英咭佛蘭之文字經商海防名譽大著振興家業堂構增輝微封翁義方有素不至此旣而否往泰來咸亨

臨吉輕財重義拯困濟窮每當凶告魯飢移乏梁粟時聞哀鳴之雁誰蘇涸轍之鱗封翁惻隱爲心匡濟時急正遇汎舟請糴長往鄰交急宜援例馳書寬征出稅領事聽其抗議飢民得以更生莫不操量鼓而虛來指困倉而實往待以舉火仰其通財正不獨置驛款賓停觴待客義田贍族仁里薰風無間人言也慨自互市海門傳教城市逃亡藉爲窟宅無賴因以讐仇官司不爲持平鄉里受其賠累怨聲載道冤氣塞天封翁憤起於心義形於色毒除兇燄法匪指名請勦逋逃法界滅跡俾株連者脫羅網被虜者慶生還交涉斷轆轤之纏民教平風波之隙視魯仲連之

排難務均其平得陳仲弓之一言無思不服封翁有焉若夫熱誠興學篤志敦宗家塾黨庠同時並設建祠修道隨地告成薰德遍於枌榆和氣被夫草木看山遣興樂鳥語之親人服疇課耕聽鳩聲之怡我宜其淳固葆貞康疆逢吉永膺多福長享遐齡胡不憇遺喪此大老春秋六十有四 德配

林夫人鴻案相莊鹿門偕隱同心黽勉則藜藿皆甘敬戒無違則縞綦亦樂階培寶樹挺秀雙枝砌繞碧桐榮舒五葉善貽謀於燕翼荷光被夫

鸞封甲算已周辰厄難免先封翁二歲而壽終子二家祥家瑞女五孫五封翁生於道光庚戌年九月初六

瓊山縣志

卷十八

金石

六十三

日戌時卒於宣統庚戌年八月廿七日寅時家祥等冬月合葬於鴻高山同里謀勒貞珉藉表懿行銘曰福同之鄉君子之宅由困而亨先難後獲蔭暘噓寒貽穀贈麥功在桑梓人沾利益義薄天雲風高泉石鶴鳴在陰駒影謝隙峩峩高山卜其北城永護幽宮長流世澤

賜進士及第翰林院編修 國史館協修商衍鎡撰文員外郎銜陸軍部主事丁酉科舉人姻姪林天嶷篆額敕授文林郎丁酉科解元乙酉拔貢愚姪曾對顏書丹宣統二年庚戌冬月吉日里人同立  
海外詩人張梅坪先生墓誌銘

嗚呼知己零落生存無幾數月以來歎逝彌已今又聞君凶耗傷何如哉憲中夜不寐憂從中來賦詩志哀藉告知己於地下而君及門請銘幽竈安能已於言也君張氏諱廷標字子芳號梅坪先世自江西來瓊占籍瓊山父雲軒尊翁隱於市以醫藥濟人有韓伯休遺風君少而聰穎遂知志學初爲詩賦出語驚人有聲庠序壯歲以還潛心經史由聲形以通訓詁由訓詁以求義理不分漢宋惟求其是而於累朝掌故以及天文地輿算術醫卜諸學無不兼通可謂古之學者也夫古人爲學出則用之於世處則傳之其徒君讀書稽古素無宦情身世艱難安之若素旣失慈蔭又賦悼亡其時雲軒尊

翁在堂爲養親計出而友教四方藉修脯所入以供菽水教人敦崇實學砥礪名節遊其門者多知名士而課讀餘閒留心著述所著經史札記梅坪隨筆澆俗山房詩文集海南百詠瓊山鄉土志災祥記等書所謂藏諸名山傳諸其人者非耶晚遇世局大變感懷時事一於詩發之逮民國成立君以憂患餘生困於疾病遂至不起彌留時囑其子書海外詩人爲墓碑嗚呼君豈僅以詩人傳哉君而以詩人傳其志愈可悲矣昔楊伯起陳太丘郭林宗等喪門人會葬者數百人勒名碑陰永志景仰今君門人請銘墓以表學行其沒世不忘可知也君生於咸豐辛亥年十一月十一日辰時卒於民國二

年四月十五日卯時壽六十三初配楊氏生男居敏女一續娶周氏生男居敘居旻女一孫家棟家楸家材曾孫以銘以鑑卜於甲寅年吉日葬西郊之原銘曰嶺南風雅肇自由江支分瓊管崛起海邦食貧力學追古作者詩宗杜韓文嗜董賈不用於世獨善其身潛研墳籍今人古人西郊之原卜其兆域爰勒貞珉垂爲世則同學弟王國憲撰文 受業楊慶鱣篆額 受業丁苑瓊書丹

中華民國三年歲次甲寅八月吉日門人同立

清故訓導劍泉曾公墓碣銘

并序

朝議大夫四品銜內閣中書南海馮愿撰并書

瓊山縣志

卷十八

金石

六十四

甲寅夏曾君對顏自海南具書狀來廣州告其同年友馮愿曰對顏幼孤府君歿時纔十有八齡耳府君歿六年乃克葬三十年墓石猶未立思先人行誼之失墜也願吾子爲文以聲諸幽愿曰敬聞命既而牽於人事未報而曾君訃遽至愿瞿然曰余負吾友矣越明年墓有宿草念吾友不可終負也乃詮次事狀而文之按狀公諱射斗字汝翼又字劍泉先世本閩人仕於瓊南之陵水因家焉元季有處士祖裔公者由陵遷瓊之邁德村故又爲瓊山人曾祖履庸太學生祖孔進例貢生父日藻按察司照磨隱居州里潛德弗耀照磨公生二子長光斗直隸州州判公其次也生而岐嶷照磨公督課

嚴遣受業於從父敬亭先生先生以優行貢成均學行爲一邑冠公稟父師教敦品勵學不隨流俗年二十五受知白學使鎔補博士弟子員學官張椒園先生許爲遠到器肄業會垣粵秀書院院長陳厚甫先生特器異之顧才長遇蹇連不得志於有司癸卯鄉試已中式以謄錄小譌被黜房考江公文煒深惋惜之宰定安延課諸兒其見推重若此年五十以歲貢就職司鐸然非所好竟不赴選好讀書博綜羣籍不爲章句訓詁道光季年外患日亟公慨然有用世志著兵書右畧十卷平夷策制礮說時弊論理財論各一卷未刊行遭難盡佚隱居自適築小園藝花木藏書三千卷盡能讀之性鯁直

有蔡兼山孝廉公故人也修邑志與議體例不合拂衣去志成摘其舛譌爲糾謬一卷蔡服其精博公節概雖峻內實冲和與人無厓岸尤精識鑒同里張虎臣副戎少拓落公竒其人贈貲投効江南營積功至三江協遠具書幣相報公能知人張不忘舊人兩稱之生平輕財賄重施予矜孤恤寡恒若不及而建宗祠修族譜用迪前人光至於毀家財紓族難尤爲人所難能者先是康熙初行編審法里苦徭役所居曰桂林圖爲十甲鄉屬一甲公之祖至山公釀貲置田按糧額均歲入以應大役同圖德之泉乾隆中葉編審令廢而歲之均如故一甲糧額多歲入所均優於他甲四甲里滑林某涎之倡

平均議訟之官不直怨公糾諸甲奪穀族人憤持械鬥斃林姓五人里滑修前怨控公主謀詞連仲子令不察捕公急公子身出亡望門投止族被株繫公破產營救盡得歸自挺身對簿公庭太守戴肇辰具三木訊仲子繫公於獄公率諸兒就獄中課之同獄笑其迂弗顧也迨長慕顏叔子志清同入庠案學使胡公瑞蘭太守馮公端本奇其才咎其冤乃平反之獄雖解而家業已蕩矣公始終不言獄冤蓋其德性堅定不以生死患難動其心者其所養可知矣公少失恃事繼母如所生照磨公年七十患癰瘡纏綿床褥者數歲時公已析居朝夕侍疾無間風雨扶持抑搔太公忘其病苦蓋三年如一

日人以爲難年六十舉季子卽對顏也甫周晬母便棄兒公躬自鞠鬻以父道兼母道束髮受書手輯禮記纂訓六卷周官纂要六卷史鑑節要二卷以課之蠅頭小楷點畫不苟其精力過人遠矣昊天不惠殲此哲人以光緒二年七月朔日遭疾終於里第距生於嘉慶五年八月二十七日春秋七十有七配梁宜人無子妾二林宜人李孺人以子貴五子慕顏附貢生安邦軍功五品志清附貢生志揚監生對顏拔貢丁酉解元女三人孫十五人暉春拔貢生曾孫九人光緒八年奉公葬於里外之涵黎陂禮也乃爲之銘銘曰瓊山之陽惟公之望涵黎之陂惟公之藏公德在族公名在鄉嗚呼不顯終

焉允臧豐碑峩峩喬松蒼蒼我銘公墓子孫億昌  
中華民國四年歲次乙卯秋月 端州梁雲衢刻字  
重修五公祠碑文

道德與勢利相背馳者也孔子沒而微言絕七十子喪而大義乖中國昔時已有道德歇絕日見泊沒於勢利之說殆如狂瀾之既倒而莫之挽也然君子立身植品獨舍彼取此壹意孤行雖赴湯蹈火而不懼者豈眞智不愚夫愚婦若哉易曰無平不陂無往不復語曰德不孤必有鄰又曰斯民也三代之所以直道而行實有不可磨滅者存也今日歐風東漸世界潮流已如江河之日下莫不鄙道德爲迂談以勢利相爭競幾成舉國若

狂之態予生也晚丁茲世變又不能遯世無悶以廢棄自甘甲寅歲就職在都遇朱濟丞觀察心儀其有道就而請益蒙示以誠爲之傾心者久之及至宦游來粵奉檄文邑復得託庇於觀察樾蔭之下觀察公餘之暇於勞形案牘而外思有以表彰前賢爲磨世勵俗之舉見瓊州有所謂五公祠者頽垣敝瓦漸就荒廢蓋遭改革以來地方有司已視爲無足輕重而漠然置之矣觀察乃商同寅黃植生鎮守使姚繼枝局長徐澹如知事邀集官紳商學倡捐巨資並酌撥公款擇日重修一新其廟貌落成有日承觀察不棄屬爲文以紀其實予識淺學疏辭不獲已姑就觀察之意代爲引申以爲瓊屬告曰

五公祠者蓋昔之朱觀察采所建以奉祀唐相李德裕宋相李綱趙鼎學士李光祕書胡銓之五賢者事業文章彪炳史冊人皆得考而知之予獨有見於勢利之不可恃而道德之不容終滅也夫五公之留遺跡於瓊也非得志於瓊乃胥因讒間而遭竄逐相繼以適茲土也若據今日學說以天演優勝劣敗之例言之應視以爲戒而去焉若浼者今復相與提倡而表揚豈不爲今世智巧之所竊笑而卒不然者其中有至理焉善與惡之垂於兩間皆出於一誠而不可掩胥不得以僞爲所謂不誠無物也五公當時身遭患難蹈道而行不見撓於勢利卒抱其卓然不朽之道德長與此永古之山河而

並著又豈五公之初念所及哉然旣誠保此道德以終積厚流光將必有道德相同者出而爲之闡微揚幽以爲之先焉及至代遠年湮流風幾絕又必有道德相同者出而爲之追溯前徽垂型將來以爲之後焉莫爲之先雖美弗彰莫爲之後雖盛弗傳今也觀察鳩工庀材整舊爲新又復就祠旁已毀之龍神風神兩廟遺址建起一園額曰瓊園內設亭軒雜以池石名其亭曰粟泉有重農務本之意焉名其軒曰洗心有潔己愛民之意焉雖因園下有浮粟洗心兩泉名以紀實而慈祥愷悌之雅懷已有流露於其間且將祠左之蘇公祠畧爲修葺左側之昭忠祠改爲兩伏波祠祀漢之有功於瓊之

路馬兩將軍亦同此表章前賢之意尤令人欽仰不置又於祠右開築馬路偶得一泉清而不寒與浮粟泉天然相對取名濟泉瓊人謂觀察精誠所感故有此甘泉出現云歌以頌之曰乾坤浩氣垂太虛浮雲富貴皆唾餘滄海桑田有遷變祇此崇廟難丘墟生也有爲死不朽觀風使者新其居祠與斯島同千古昔受折磨今何如

清翰林院檢討民國署文昌縣知事後學高桂馨謹撰  
清賜進士出身民國福建政和縣知事後學李熙敬書  
中華民國五年歲次丙辰春月之吉立

清特授花縣教諭甲午科舉人李琴舫先生墓志銘

瓊山縣志

卷十八

金石

六十九

先生隴西李氏諱□□字鳳岡號琴舫世居瓊山西廂圖道客村父思忠庠生有文名先生髫年英異出筆驚人年十五應童試李明府景沆賞其文藝拔冠一軍稱爲海外佳士弱冠赴試羊城留學粵秀書院其時院長陳厚甫太史爲浙東名宿來粵主講出其門者無非竒尤碩彥先生受業門下始以其年少忽之及研摩精進不數月遂與廣屬諸名士相頡頏太史大加激賞決其秋闈破壁飛去榜出果中前列年僅二十一瓊士少年登科首推先生四上春官薦而不售主講定安尚友書院裁成者衆年踰五旬始選授花縣教諭履任後當道聞其才學聘主花峰書院講席勤於課士來學者講舍

不能容譚藝論文翕然悅服風氣爲之不變春秋兩榜皆門下士爲多故司鐸二十年與邦人士相得不求轉調缺分雖苦安之而已其文章氣節非時人所能及光緒六年 月 日終於花縣學署壽享八旬始娶鄭氏生長男元禧續娶馮氏生次男瀛杰孫六長良翰次良英長男出三良貴四良禎五良越六良培次男出元舊等扶柩歸葬於龍岐坡門下士謀立貞珉以藩從遊最久知之最悉銘以志幽銘曰

寶章高風講學不息韋彪樂道教授自得伊古賢豪修行竒特琴舫先生古人是式卓犖英姿精深學力鶚薦名高文章華國秉鐸花縣宏宣教澤化雨春風人文作

則卓異三膺恩隆北極泰山其頽典型空憶爰卜龍岐營安兆域峩峩貞珉千秋不泐

五品銜特授茂名縣訓導移補教諭乙亥恩科副貢受業王樹藩拜撰

六品銜歷任饒平陽春始興縣教諭辛酉科拔貢受業王龍章篆額

五品銜朝考二等卽選訓導甲午科優貢表再姪壻王國棟書丹

光緒乙未年仲春月門人同立

清勅旌節孝文長嫂陳孺人墓誌銘

先訓導君同懷女兒三長者適文早寡矢節撫孤其孤

曰其煥能承先業先君數稱其賢且稱其側室陳孺人之賢予趨庭時熟聞之而未能道其詳今冬孺人之子彩鳳以孺人久荷旌表謀立石以垂諸遠屬予誌於墓予讀其狀始悉先君之所稱者爲不虛而益歎孺人之節之足傳也孺人爲郡西景行街陳致堂明經廣文季女家傳禮教孺人少秉姆教以容德稱年方十六歸其煥君爲造偕嫡氏蒙婉婉相得雙心一秣不足喻之閱四載而寡於時懷彩鳳君甫數月痛不欲生姑及嫡喻以大義始抑哀思末久彩鳳君生鞠苦訓辛逮乎成立無稍姑息文本世族至此中落彩鳳君躬勤經紀家業復昌嗣君誠賢矣哉微慈母之力不及此所尤難者嫡

室暨所出諸子先後下世孺人撫育諸孫無異所生婚嫁各得所嗚呼是可謂巾幗中之程嬰杵臼者矣孺人卒時年六十有八葬二水西善村東原子一卽彩鳳孫三曾孫二家門競爽方興未艾蒼蒼者之報苦節何其久而益彰歟予旣爲文誌墓因銘曰

森森松柏能受風霜矯矯節母能振綱常相彼淑姬深明大義漆室之音栢舟之志剝極必復困久則通孫曾玉立薛鳳荀龍綽楔之標垂於彤史我述芳徽示諸後嗣敕授文林郎揀選知縣乙酉科拔貢丁酉科解元表弟曾對顏撰並書

光緒二十九年秋月合族立